



册府元龜

卷之五百五十二
至五十五



13
849
184



門 3
849
卷 184



册府元龜

淮南李嗣京叅閱

西極文翔鳳訂正

豫章黃國琦較釋

詞臣部

獻替

謬誤

稽緩

獻替第二

唐韋處厚穆宗時為翰林學士中書舍人時張平叔
以便佞詆諧他門捷進自京兆尹為鴻臚卿判度支
不數月宣授戶部侍郎平叔以征利中穆宗意欲希

册府元龜 詞臣部 卷之五百五十三

大任以權鹽舊法爲弊年深欲官自糶鹽可富國彊
兵勸農積貨疏利害十八條詔下其奏令公卿議處
厚抗論不可以平叔條奏不周經慮未盡以爲利者
反害以爲簡者至煩乃取其條自尤不可者發十難
以詰之時平叔傾巧有恩自謂言無不允及處厚條
什駁奏穆宗稱善令示平叔平叔詞屈無以答其事
遂寢處厚以幼主荒忘不親政務既若納誨之地宜
有以啓道性靈乃銓擇經義雅言以類相從爲二十
卷謂之六經法言獻之錫以繒帛銀器仍賜金紫以
憲宗實錄未成詔處厚與路隨兼充史館脩撰實錄

未成許二人分日入內仍放常參處厚俄又權兵部
尙書敬宗卽位李逢吉用事素惡李紳乃搆成其罪
禍將不測處厚與紳皆以孤進同年進士心頗傷之
乃上疏曰臣竊聞朋黨議論以李紳貶黜尙輕臣受
恩至深職備顧問事關聖德不合不言紳先朝獎用
擢在翰林無過可書無罪可戮今羣黨得志讒嫉大
興詢於人情皆甚歎駭詩云萋兮菲兮成是貝錦彼
譖人者亦已太甚又曰讒言罔極交亂四國自古帝
王未有遠君子近小人而致太平者又古人云三年
無改於父之道可謂孝矣李紳是前朝任吏縱有罪

愆陛下尤宜洗釁滌瑕念舊忘過以成無改之美今
逢吉門下故吏遍滿朝行侵毀加誣何詞不有所賤
如此猶謂太輕蓋曾參有投杼之疑先師有拾塵之
戒伏望陛下斷自聖慮不惑姦邪則天下幸甚建中
之初山東向化只緣宰相朋黨上負朝廷楊炎爲元
載復讎盧杞爲劉晏報怨兵連禍結天下不平伏乞
聖明察臣愚懇帝悟其事紳得減死貶端州司馬處
厚正拜兵部侍郎謝恩於思政殿時昭愍狂恣屢出
畋遊每月坐朝不三四日處厚因謝恩從容奏曰臣
有大罪伏乞面首帝曰何也處厚對曰臣前爲諫官

不能先朝死諫縱先聖好畋及色以至不壽臣合當
誅然所以不死諫者亦爲陛下此時在春宮年已十
五今則陛下皇太子始一歲矣臣安得更避死亡之
誅帝深感悟其意又山南東道節度牛元翼家悉爲
鎮州節度王庭湊所害敬宗旣聞元翼一家無辜併
命深歎宰輔之無才致使姦兇久未率化處厚因上
疏曰臣聞汲黯在相淮南不敢謀反干木在魏諸侯
不敢加兵王霸之理皆以一士而止百億之師以一
賢而制千里之難伏以裴度勳高中夏聲播外夷庭
湊克融皆憚其用吐蕃迴鶻悉服其名今若置之巖

廊委其叅決西夷北虜未測中華河北山東必稟廟
筭况幽鎮未靜尤資重臣管仲曰人離而聽之則愚
合而聽之則聖理亂之本非有佗術順人則理違人
則亂伏承陛下當食歎息恨無蕭曹今有一裴度尚
不留驅策此所以馮唐感悟漢文雖有廉頗李牧不
能用也夫御宰相當委之信之親之禮之於事不効
於國無勞則置之散寮黜之遠郡如此則在位者不
敢不勵將進者不敢苟求陛下存終始之分但不永
棄則君臣之厚也今進皆負四海責望退亦不失六
曹尚書不肖者無因而勸臣與逢吉素無私嫌臣被

裴度無辜貶官今之所陳上答聖明下答群議披肝
感激伏地涕流伏乞鑒臣愛君矜臣體國則天下幸
甚初度爲逢吉所排至是復兼相任皆處厚與李程
內以公議贊成寶曆元年四月冊尊號禮畢大赦天
下是時幸臣李逢吉與端州司馬李紳不叶所撰赦
文但云左降官已經量移者宐與量移不言未量移
者蓋欲使紳不露恩例也處厚上疏曰伏見赦文節
日中新左降官不該恩澤大宥之體有所不弘臣竊
聞物議皆言逢吉恐李紳量移故有此處置若如此
則應是近來流貶官因李紳一人皆不得量移事體

至大豈敢不言李紳先朝獎任曾在內庭自經敗官未蒙恩宥古人云人君當記人之功忘人之過管仲拘囚齊桓舉爲國相冶長縲紲仲尼遷爲密親有罪宐猶蕩滌無辜豈可終累况鴻名大號册禮盛儀天地百靈之所鑒臨億兆人紘之所瞻戴恩澤不廣實非所宐臣與逢吉素無讎嫌與李紳且非親黨所論者全大體所陳者存至公伏乞聖恩察臣肝膈儻蒙允許仍望宣付宰臣應近年左降官竝編入赦條令准舊例得量移近處帝覽奏深悟其事乃追赦文令添改繇是紳得移爲江州長史

高鉞爲翰林學士敬宗初遷中書舍人學士如故謝恩於思政殿因諫帝以求治莫若躬親用示憂勤之旨也帝嘉深納其言

柳公權文宗太和中爲中書舍人翰林書詔學士文宗因便殿對六學士語及漢文恭儉帝舉袂曰此滌濯者三矣學士皆贊詠儉德唯公權無言帝留而問之對曰人主當進賢良退不肖納諫諍明賞罰服滌濯之衣乃小節耳時周墀同對爲之股慄公權詞氣不可奪累遷諫議大夫工部侍郎學士如故開成中嘗入對帝謂之曰近日外議如何公權對曰自郭晔

除授邠寧物議頗有臧否帝曰收是尙父之從子太皇太后之季父在官無過自金吾大將軍授邠寧小鎮何事議論耶公權曰以收勳德除鎮攸宐人情議論者言收進二女入宮致此除拜此事信乎帝曰二女入宮參太后非獻也公權曰瓜李之嫌何以戶曉因引王珪諫太宗出廬江王妃故事卽令南內使張日華送二女還收公權忠言裨益皆此類也

韋澳大中中爲翰林學士承旨與同僚蕭寘深爲宣宗所遇二人同直無不召見詢訪時事每有邦國刑政大事中使傳宣草詞澳心欲論諫卽曰此一事須

降御札方敢施行遲留至旦必論其可否帝多從之李蔚爲翰林學士承旨禮部侍郎懿宗咸通十二年賜安國寺講唱僧重謙僧承澈沉檀木講經唱經座各一仍設萬人齋蔚以帝造寺捨施不已上疏曰臣聞孔丘聖者歟言則引周任之言符融賢者也諫必憑王猛之諫事求師古詞貴達情臣伏覩陛下自纂帝圖克崇佛事止當脩外未堪得中今歷採本朝名臣有忠直裨于上者輒思陳敘以補聖明臣聞天后時曾營大像功踰百萬狄仁傑上疏云夫寶鏡殫于綴飾環材竭于輪奐功不使鬼必在役人物不天來

皆從地出非損百姓將何以求生之則有時用之則無度臣每思惟實所悲痛其如往在江表像法盛典梁武簡文捨施無限及至二淮沸浪五嶺騰煙列剎盈衢無救危亡之禍緇衣蔽路豈有勤王之師况近年以來風塵屢擾水旱不節征役稍繁必若多費官錢又苦人力一隅有難將何救之此切當之言一也中宗時公主外戚皆奏度僧姚崇奏曰佛不在外求之於心佛圖澄最賢無益於趙羅什多藝不救于秦何充符融皆遭敗滅齊襄梁武未免災殃但發慈悲行利益事使蒼生安樂卽是佛身此切當之言二也

睿宗爲金仙玉真公主造大觀辛替否諫曰自夏已來淫雨不解穀荒不壟麥爛于場入秋已來亢旱成災苗而不實霜損蟲暴草萊枯黃下人各嗟未知闕賑今陛下愛兩女爲造兩觀燒磚運木載土填沙道路流言皆云計用錢百萬餘貫伏惟陛下聖人也遠無所不知陛下明君也細無所不見旣知且見知倉有幾年之儲庫有幾年之帛知百姓之間可存活乎三邊之士可轉輸乎當今發一卒以禦邊陲遣一兵以衛社稷多無衣食皆帶飢寒賞賜之間迴無所出軍旅驟敗莫不繇斯而乃以百萬貫錢造無用之觀

以賈六合之怨以違萬人之心乎此切當之言三也
又諫造寺曰夫釋教以清淨爲基以慈悲爲主故嘗
體道以濟物不利欲以損人每去已以全真不營身
以害教今三時之月築山穿池損命也殫府虛帑損
人也廣殿長廊營身也損命則不慈悲損人則不濟
物營身則不清淨豈大聖至神之心乎經曰一切有
爲法如夢幻泡影如露亦如電臣以爲減琬琢之費
以賑貧人是有如來之德息穿掘之苦以全昆蟲是
有如來之仁罷營葺之直以給邊陲是有湯武之功
迴不急之祿以購清廉是有唐虞之理陛下緩其所

急急其所緩親未來而疎見在失真實而莫虛無重
俗人之所爲而輕天子之功業臣實痛之此切當之
言四也臣觀仁傑天后高宗朝上公也元崇先天闢
元中賢哲也替否中宗睿宗特直臣也每覽斯文則
未嘗不廢卷長歎而感慕之臣幸居近侍叨職貳卿
胷臆之間雖寡秋毫之智肺腸之內厚涵春露之濡
旣自昧讜言又不稽故事覩顏順旨其何以安願迴
日月之明少鑒芻蕘之款帝循省加歎竟未能罷其

事

後唐趙鳳同光中爲翰林學士莊宗命劉皇后拜張

全義爲養父后傳教令草謝全義書鳳以國后無拜人臣爲父之禮乃密上疏陳其失曰臣叨被睿慈獲親密勿在可言之地居掌誥之司其或事異嘗規禮闈草創程式先謀於國輔封章然貢於天聰庶顯公忠免貽錯失今月九日中宮傳命令修張全義書題柴行父事之儀有玷君臨之道旣行文翰難決否臧奉行則罔叶國經違命則恐虧臣節遂修記事取則宰臣貴動合於楷模期永垂爲規範以茲奉職庶顯致君臣聞覆萬物者天載萬物者地非聖主無以體乾道非賢后無以法坤儀百代攸同二儀無改伏惟

陛下恢張九五統馭玄黃外設明廷內崇陰教言動而華夷知仰弛張而幽顯欽承張全義雖位極於王公而名不離於臣接承陛下曲旨受皇后重儀致素彝章不防輿議臣又聞纂洪基者真主行直道者忠臣不可務一時之緘藏失久長之體制得不恭陳手疏罄露血誠庶裨益於神聰免隳弛於王度伏乞皇帝陛下俯容狂瞽動畏簡書時開睿敏之懷永守文明之訓使聖后式全其內則元臣可保於令圖永揚日月之光載理乾坤之體臣職叨侍從名忝論司僮避事以不言是儉安而冒寵疏奏帝雖嘉其直誠而

劉后已拜全義追改無及

劉贊爲北部郎中知制誥明宗天成二年八月贊上言曰臣聞信者使民不惑義者使民知禁非信無以彰明德非義無以顯聖猷此乃三代英風百王令則伏惟陛下恭臨寶位虔紹鴻圖握金鏡而炤萬方運璇璣而調四序遐敷至德廣納忠言凡列周行許陳封事雖皆聽覽而尙寡依行縱所依行亦未遵守自此或有益國利人之術除姦去弊之謀可以擇其所長便爲永制仍乞特頒詔令峻立條章豈唯示信義於域中抑亦振威風於海內旣遵法度必致治平久

張文寶爲中書舍人天成二年十一月文寶上言曰巡狩省方唐虞之舊典弔民伐罪湯武之前功陛下親統貔貅盡除梟獍刷盪瑕穢殄息氛埃天威已震於華夷濡澤又沾於幽顯動植蘇秦遐邇歡康所宜旋軫神都凝旒紫禁居中土而表正來萬國以均輸允叶億兆之心共樂雍熙之化
于嶠爲戶部員外郎知制誥天成二年嶠上言請邊上兵士起置營田數趙充國諸葛亮之術庶令且戰且耕望致輕徭三年嶠又上言曰有國有家旣定君臨之位無偏無黨方明王者之心苟少虧於同軌同

文則微損于盡美盡善竊知河朔令錄須俟本道薦揚朝廷就加其命况今萬國諸侯猶請行而貢職豈使一方令長獨端坐以邀官未敢革故之風深缺維新之化觀茲闕政敢貢直言乞宣付中書委於銓管此後竝從常調七月橋上言曰協和萬邦明主所以安社稷平章百姓哲后所以懷黎民將延七百載之洪基須安億兆衆之黔首臣幸遇聖明之代敢傾愚直之誠伏以朝廷先有指揮今年不更通括苗畝宣從特旨頒作溥恩且屬夏秋已來霜雨頗降在山川高土則必有豐年想藪澤下田非無水沴脫或已作

潢汗行潦猶微青苗地頭不唯損邦國風化兼恐傷天地和氣儻或皇帝陛下念茲在直哀彼災祥特於淹浸之田別示優隆之澤重委鄉村父老通括不令州縣節級下鄉如或檢驗不虛即日蠲減租稅或有司以軍糧未濟兵食是虞卽請却於山川之田豐熟之地或於麻畦稗草蠶鹽地頭據其本分價錢折納諸色斛斛所謂公私俱濟若樂皆均捨其短以從其長將有餘而補不足臣每因急務方敢上言前後所奏十件有司未行一件伏乞陛下念臣苦思察臣盡心或可施行不令停滯

晉程遜初仕後唐爲中書舍人上言以民間機織多有假僞虛費絲纒不堪爲衣請下禁止庶歸朴素後爲翰林學士與學士和凝張厲等上十三事其一前代帝王親觀風俗訊民利病其後不暇親行亦遣使巡行風俗唐朝於十道置採訪使一員請如舊制亦冀民病蘇舒其二天成已來久不括田自水旱累年民戶疾苦不均今歲夏秋或稔於嘗歲請行檢括庶獲均輸其三中原邊上率多閒田可令近下軍都興起屯田舊時銅冶鐵冶亦令軍人興置不費于民其四人君求理欲廣視聽須群臣上言然則人才有短

長智略有能否其於聽用之間乞留睿鑒伏恐失人其五朝野官吏人數衆多若不行黜陟之科何以察其能否望准考課令凡中外官歲終較考以行進退其六古人得位相讓所冀不掩賢能得其髦俊請依建中故事群官受命後舉人自代其七治道旣知損益務實去華伏見自中興以來或於邊境權立州縣名目戶口不多虛張吏員枉費祿食其權置名目望一切停省以賑邊軍臣伏見徐宿州管內有泗濱院徐山院市丘院白土務所管人戶共數千家請罷廢名額其戶稅請還州縣其八請止游惰勸農桑減冗

食之員停不急之務其九君上置諫諍之官此期聞過况聞官給諫紙虛佇讜言時政有所不便請諫官陳論詔書有所依違請給事中封駁其十國朝承平時諸監鑄錢不輟尚不能給今國家所鑄絕少而市人銷錢貴賣銅器累行止絕尚未知禁伏乞嚴下條法其銅除鏡鞍轡帶外不許市賣銅器犯者以賊論其十一沿邊鎮戍請明斥堠習戰陣謹烽候令夷狄知懼戰必有功其十二每年給散蠶鹽不敷斤兩雜之以硝土請給散之時命清強官止絕其十三伏聞關西河東人民飢饉殍殍者多其城市鄉村積粟

之家望令官司通指姓名俾令出糶以濟飢民中書門下覆奏程遜等十三事其置採訪使難擇公清之吏却生僥倖之門問疾苦則未能勞供須則轉費况刺史廉使自合訪求不勞別置其累年水旱欲與檢田以均勞逸今年夏苗已多災旱秋稼今未及時請下三司可否聞奏其屯田治務興造之初所費不少今國力未辦可俟佗時其受官舉代劉鼎近已上聞其餘九件竝可施行擇良善爲心腹群官書考併省州縣止游惰勸耕桑諫官論事給事封奏斷用銅器邊城習武備差官散蠶鹽均糶以濟飢民等事詔曰

程遜等所陳時務竝關王道兼雜霸圖益國利民無所不至成仁去害悉在其間救時病以良多比忠言之更切封駁詔勅尤可施行餘據事條下所司周張昭遠初仕後唐為都官員外郎知制誥明宗長興元年昭遠奏古者聖帝明王愛民恤物先要察其利病愍其凶災旣甦續以垂旒難家至而戶曉其間疾苦安測細微臣每見諸處奏報今春已來穀價絕賤如聞梁益抱聊生之歎登萊有餓殍之人方當盛明深不宐稱臣必恐下民疾苦理道未周長吏旣不上聞百姓無繇自訴藏姦積弊威福臨人僻郡遠藩

慘舒自我苟無廉問何表雍熙竊觀本朝二十聖之規模三百年之基構事皆師古政在安民一歲不登則命輶軒之使三農或匿則覃蠲賑之恩所以國祚延長生靈推戴上布穆清之化下無愁難之聲詢於舊章其道猶在唯聖主行之臣請依本朝舊事選擇郎官御史清強幹事者每歲分行天下宣問風俗求瘼懲違凡人間疾苦巨細盡許上聞朝廷詳其利害則皇風遠洽貪吏革心庶幾明時盡除弊政疏奏不報

和凝初仕後唐末帝清泰二年為翰林學士上言當

貞觀之朝則廣開醫學及開元之代則親制方書爰
在明朝宐遵故事方今暄熯在近疫癘是虞言念軍
民宐加軫閱其邊遠戍卒及貧下農人旣難息於苦
辛或偶縈於疾疹地僻旣無藥物家貧難召醫師遂
致疾深多罹物故荷戈執耒皆展力於當年問疾賜
醫宐覃恩於此日其諸處屯戍兵士令太醫署修合
傷寒時氣瘧痢等藥量事給付大軍主掌以給有病
士卒之家百姓亦准醫疾令合和藥物救其貧戶兼
請依本朝州置醫博士令考尋醫方合和藥物以濟
部人其御制廣濟廣利等方書亦請翰林醫官重校

定頒行天下

王易簡仕晉爲中書舍人天福二年易簡進漸治論
曰臣聞天地之道起於漸夫天之高畜雷霆之威雨
露之惠覆於萬物必從漸而生以地之厚負江海之
滋淮濟之潤載於萬物亦從漸而長况人者無天之
功乏地之力勞方寸之心豈可急速而治天下也惟
我后膺圖履運握鏡臨人蘊勤儉之風秉弘厚之德
內無耽翫外絕奢華信任股肱委仗將帥自有仰成
之化固多定亂之功今者所以尙橈聖懷親勞御札
者何直以庫藏稍虛士卒微情使天威之莫震令王

化之未敷此則非臣下之無謀豈君上之有過蓋承
偽廷之困弊遇數歲之亂離今國家安靜以圖功不
可躁而取失或欲急徵暴斂則百姓愈逃或以峻法
嚴刑則三軍益叛莫若制治於未亂求安於未危者
也凡止亂危者應上玄則以好生惡殺爲心接諸侯
則以舍垢匿瑕爲念夫如是卽水旱無繇而興干戈
何門而動也考諸政教則禮樂咸在刑賞具存任四
輔提其綱遣百司舉其目必見梯航常貢士馬日精
所謂強其幹而弱其枝深其根而固其蒂於是天地
有清和之氣星辰無謫見之災可以薄賦恤萬民足

以虛懷馭群后或思正名于中夏問罪于殊方人皆
同心兵必戮力寮區既定帝道自隆躋元首爲睿聖
之君列四輔作賢明之相主則社稷無患臣則子孫
永安此則顯漸之功見治之驗矣勅王易簡手演王
言心資帝業當開創之運以遠大而論天不能感變
四時地不能躁成萬物况當革夏盡已從周化未可
以驟行事只宜於漸治不疾而速其在茲乎所貢論
宜付史館

竇貞固仕晉爲翰林學士中書舍人天福三年貞固
奏曰臣伏觀先降御札令文武百僚各進封事臣聞

舉善爲明知人則哲聖君在位藪澤莫有於隱淪昭
代用才政理自無於紊亂求賢若渴從諫如流鄭所
以譽子皮魯所以譏文仲爲國之要進賢是先庶遵
理治之風左舉仁人之器臣今欲請降勅命指揮文
武百寮每一司之內共集議商推一士奏薦述其人
有某能某解堪爲某官某職便請朝廷據奏薦任用
若能符薦果爲當才卽請量加獎賞或有乖共舉兼
涉徇私亦請量加殿罰所貴官孫德序位以才昇二
人同行尚聞擇善十日所視必不濫知臣職在論思
位參近侍每謝匪躬之節常慙濡翼之譏將贖貪功

聊陳狂狷勅曰進賢受賞備有前文得士則昌斯爲
急務實貞固名參閭籍職在禁庭貢章疏以傾心請
班行而薦士于可否之際分賞罰之科所貴當人無
或曠職今後宜許文武百寮于縉紳之內草澤之中
知灼然有才器者列名以奏納其章疏記彼姓名否
臧盡達於予懷用捨免私於公議仍付所司
李詳爲中書舍人上疏曰臣聞除舊布新故順天而
設教惟名與器不假人以樹恩所以示寓縣之至公
所以仰朝廷之大柄今則旣逢英主未革前蹤是敢
聊舉一端輕塵四遠酌其損益幸補涓埃伏覩南衙

兩班內庭諸局或有不文不武非舊非勳論伎術則罔有所長語才行則罕聞其異但思月限以冒官常俾五細以在庭使四方而何則有虛華級仍蔭私門忝營更及於子孫祿利徒銷于府庫况今方興戎事久困生民顧無用之官寮具員無關計有限之財力帑藏正虛若不去留定成耗蠹伏望略加澄汰稍辨幽明則支分或減于殷憂內外庶成于通濟又觀十年已來肆赦頻降諸道職掌一例獎勵藩方不守於規程奏薦罔論其高下僕隸則動逾數百絲綸則皆示特恩所以舍場管鑰之微人曹局簡札之小吏至

於伶倫賤類洒掃庸奴初命便假於貴階銀章青綬拜賜遽披於法服牙笏紫袍乃致貴賤不分寵榮濫被雖雷雨作解渥澤恐遺於萬物而衣裳在笏貞規何法於百王此後或有溥恩應諸道職員主兵將拔外其衙前職列伏乞明示條章俾循事體節度州只許奏都押衙都虞侯教練使客將孔目官及有朱記大將十人仍取上名友郡則只許薦都押衙都虞侯孔目官其諸色人竝委本道量轉職次則得之者感恩有異受之者與衆稍殊寰區仰天子之尊藩后知王澤之貴名器之重治亂是資伏惟陛下俯廻宸覽

略炤愚衷勿爲小善不行勿謂舊弊難改失之在漸
謀之在初儻或因此留神自可觸類而長宰臣奏李
詳才光鳳閣志奉能圖聰明有作誥之方名器無假
人之理以茲留意爰具上章乃是大綱且非小善旣
叶聖人之教可嘉君子之言所奏節度刺史州衙前
職員等事望賜施行從之

竇儼世宗顯德末爲翰林學士上疏曰臣伏觀御札
應內外臣寮有所見所聞竝許上章議論者臣菲才
寡識備位曠官仰承綸綍之言聊貢芻蕘之說其一
曰伏以設官分職授政任功欲爲政之有倫在命實

之無曠今朝廷多士省寺華資無事有員十乃六七
止於計月待奉計年待遷其中廉幹之人不無愧恥
之意如非歷試何展公才伏請改兩畿諸縣令及外
州府五千戶上至縣令爲縣大夫并爲從五品下畿
大夫見府尹亦如令之儀其諸州府縣大夫見本部
長官如賓從之禮郎中員外郎起居補闕拾遺侍御
史殿中侍御史監察御史光祿少卿以下四品太嘗
丞以下五品等竝得衣朱紫爲之滿日當在朝一任
約舊官遷二等自拾遺監察除授迴日卽爲起居侍
御史中行員外郎若前官不是三署卽罷後一年方

得求事如此則士大夫足以陳力賢不肖無以駕肩
各繫否臧明行黜陟利民益國斯實良規其二曰為
國為家之方守穀守帛而已二者不出於國而出於
民其道在天其利在地得其理者蕃阜增積失其理
者耗嗇燠勞民之頽蒙宐有勸教伏請於齊民要術
及四時纂要韋氏月錄之中采其關於田蠶園圃之
事集為一卷下三司彫木版廣印頒下諸州流布民
聞疏奏雖不即行物議寔之

謬誤

夫履赤墀之塗居青瑱之署掌惟行之令代如絲之

言必須兼資才識精練典故極其思慮以奉攸司乃
有失稽古之意違詳審之理或敘述漏略或高下非
宜既不切於事機且有辱于綸命四禁之制斯為重
焉至於黜免亦自述爾

後魏道武天興初姚興侵晉襄陽成成將鄒恢馳使
乞師於常山王遵遵以聞帝詔御史中丞崔逞與裴
袞為遵書以答初恢與遵書云賢兄虎步中原帝以
言悖君臣之體勅逞袞亦貶其主號以報之逞袞乃
云貴主帝怒曰汝貶其主答乃稱貴何若賢兄也遂
賜死

孝文時蠕蠕國有喪帝遣中書監高閭為書與之不
叙凶事帝謂曰卿為中書監職典文詞所造音書不
論彼之凶事若知而不作罪在灼然若情思不至應
謝所任閭遂引愆免冠謝罪

唐德宗興元元年杜佑自饒州刺史除嶺南節度使
時帝在山南朝廷故事報政往往遺脫舊嶺南節度
常兼五管經略使佑獨不兼故五管不屬嶺南自佑
始也

貞元三年二月謚大行皇后王后為昭德皇后詔兵
部侍郎李紆為謚冊文既進帝以紆之文謂皇后為

大行皇后非也留中不出復詔翰林學士吳通玄為
之通玄文云睿后王氏議者亦以為非案貞觀中岑
文本撰文德皇后謚冊曰皇后長孫氏斯得之矣

十一年五月以宣武軍節度支度營田汴宋毫潁觀
察留後汴州刺史兼御史大夫李萬榮為宣武軍節
度副大使知節度事兼管內支度營田汴宋毫潁觀
察便依前兼御史大夫又以招義軍節度支度營田
澤潞州大都督府左司馬知府事兼御史大夫王虔
休為澤潞州大都督府長史昭義軍節度副大使知節
度事管內支度營田澤潞磁邢洛觀察使依前兼御

史大夫以朔方留後李樂為靈州大都督府長史朔方靈鹽豐受降城定遠城天德軍節度支度營田觀察押蕃落使依前兼御史中丞初詔下萬榮度休樂等各除本府司馬及內出告身始為長史然後追制改焉

十五年八月贈故四鎮北庭涇原節度使田希鑿陝州大都督希鑿自涇原已改尚書衛尉此贈誤官衛也

十六年九月贈左散騎常侍駙馬都尉郭暖工部尚書暖大曆十四年授左常侍建中二年以憂罷與亮

元年二月授太常卿同正以至於終今詔書言嘗侍誤也

憲宗元和八年十月戊戌以左神策軍普潤鎮使蘇光榮為涇州刺史兼御史大夫充四鎮北庭行軍兼涇原等州觀察使翰林學士司門員外郎韋弘景草制漏敘勳勞是月辛丑詔弘景守本官落職十二年七月丙辰以中書侍郎平章事裴度為門下侍郎平章事充彰義軍節度由光蔡等州觀察淮西宣慰處置等使其制翰林學士中書舍人令狐楚所草也度以是行兼招撫請改其辭中未翦其類為未

革其志又以韓弘爲都統請改更張琴瑟爲近輟樞
輔又改煩我台席爲授以成筭憲宗皆從之乃罷楚
學士

十二月詔刑部侍郎韓愈撰平淮西碑文旣成而淮
西節度使李愬姻聯戚里其妻上言愈敘愬之功不
平後有詔刊磨愈文別命段文昌撰述

梁太祖開平三年四月翰林學士鄭珪盧文度以書
詔漏略王言罰兩月俸

後唐明宗天成二年十一月壬申詔太宗朝左僕射
李靖可冊贈太保鄭州僕射陂可改爲太保陂時議

者以僕射陂者後魏孝文帝賜僕射李冲故因以爲
名及是命之降以爲李靖蓋誤也

四年八月太子太傅李琪奉命撰故青州節度使霍
彥威神道碑初琪仕梁至平章事而私懷感遇之意
舊之工碑版者奉勅撰碑皆始敘君上獎功之道承
詔撰述之旨每於立意皆稱臣彥威仕梁位至方面
及茲敘其揚歷必須指名幾任是僞幾任是朝命琪
不欲指斥僞梁所撰碑文自初不稱臣中書覆奏云
李琪所撰霍彥威神道碑文旣不分真僞是混功名
望令改撰從之

夫居代言之職處備問之地起存工拙性分利鈍或持橐而從遊或簪筆而赴召乃有思靡流通情惟底滯含毫而若失授簡而後成不能厝詞或雁奏免布之朝聽徒負靦顏如其吐詞雖妍移晷乃就是謂晚成可以塞責斯則庶幾矣

漢司馬相如武帝時與枚臯俱為郎從行至甘泉

下孟雍河東東巡狩封泰山塞決河宣房游觀三輔

離宮館臨山澤弋獵射馭狗馬楚勒刻鏤

實以物楚賜為戲樂帝有所感輒使賦之臯為又

疾受詔輒成故所賦者多相如善為文而遲故所作者少而善於臯

魏和道高貴鄉公時為侍中甘露二年幸辟雍會命

羣臣賦詩道與尚書陳騫等作稽留育司奏免官詔

曰吾以闇昧愛好文雅廣延文賦以知得失乃爾紛

紜良用惻然其原適等

宋謝靈運文帝時為侍中與顏延之俱以詞彩齊名

而遲速懸絕帝嘗勅各擬樂府比上篇延之受詔輒

成靈運久之乃就

梁張率高祖時為司徒掾直文德待詔省侍宴壽光

殿帝詔羣臣賦詩率與太子中舍人劉儒並醉未及成帝取孺手板戲題之曰張率東南美劉孺維陽才攬筆便應就何事久遲廻

北齊李愔為中書郎文宣在宴席口勸以魏收為中書監命愔於樹下造詔愔以收一代盛才難於率爾久而未訖比成帝已醉醒遂不重言愔仍不奏事竟寢

隋薛道衡為內史侍郎每至構文必隱空齋踞壁而臥聞戶外有人便怒其沉思如此

唐陸餘慶則天時為中書舍人常引入草詔餘慶惶感至晚竟不能厝一詞責授左司郎中

李建穆宗長慶元年除兵部郎中知制誥自以草詔思遲不願當其任旋改京兆少尹

後唐崔沂初仕唐昭宗時累遷員外郎知制誥性抗厲守道而文藻非優嘗與同舍顏蕘錢玘俱秉筆見蕘玘贍速草制數十無妨談笑而沂自愧翌日謁國相訴曰沂疎淺不足以供詞翰之職相輔然之移為諫議大夫

封舜卿唐末為禮部侍郎知貢舉梁開平中與門生鄭致雍同受命入翰林為學士致雍有俊才舜卿雖

有文辭才思拙澁及試五題不勝困弊因託致雍乘
 筆當時譏者以為座主辱門生
 周劉溫叟初仕晉為翰林學士知制誥北虜犯闕溫
 叟恐備其行與承旨張允正章求免所職及漢祖至
 汴宮久而來見執政援引欲置於兩制溫叟堅求散
 秩言稍詆訐蓋溫叟在翰苑日遇詞日繁變常難具
 才之不迨有退倦之志遂除駕部郎中

冊府元龜

冊府元龜

淮南李嗣京叅閱

西極文翔鳳訂正

豫章黃國琦較釋

國史部

總序

古之王者世有史官君舉必書書法不隱所以慎言
 行示勸戒也自伏羲始造書契神農之世民風尚樸
 官設未備黃軒之臣曰倉頡取象鳥跡以作文字記
 諸言行竹冊而藏之史官之作蓋自此始

一云黃帝得圖書於

河洛史皇倉頡狀焉又夏商皆有太史古之太史雖以著述為宗而兼掌曆象夏太史終吉當桀之暴知其將亡乃執其圖法奔於商商太史高勢知紂之亂載其圖法奔

周周監二代竝建眾職春官宗伯之屬有太史掌建

邦之六典下大夫二人上士四人小史掌邦國之志

中士八人下士十有六人內史掌王之八柄之法以

詔王治中大夫一人下大夫二人上士四人中士八

人下士十有六人外史掌書外令四方之志及三皇

五帝之書上士四人中士八人下士十有六人皆有

府史胥徒之屬文武之時有史佚穆王有內史作穆天子傳宣王有史籀幽王有太史伯

陽一云老子為柱下史惠王有內史叔興父諸侯亦各有國史齊有

南史子余史囂晉有太史屠黍見晉之亂亦以其圖法歸周又有太史趙太史董狐史墨史蘇衛有史華

龍滑魯有太史克左丘明楚有左史倚相及史老秦穆公十三年初有史以紀事魯又有外史鄭有太史

而無名者而晉大夫趙鞅亦有書過之臣乃陪臣之僭也戰國之世咸有史官趙秦

會滬池各命侍史書事齊田文每對賓客令紀於屏風皆其事也秦并天下有太史

令御史之名太史令胡毋敬作博學章御史張蒼掌柱下方書之類是也漢武帝

始置太史公位在丞相上以司馬談為之天下文書先上太史副上丞相談卒

子遷宣帝改為太史令行太史公文書其修撰之職

以官領之太史之官唯知占候而已又有禁中起居注注宮中起居

之王莽改置柱下五史秩如御史聽事侍旁記其言行此又起居之職也漢

氏中興圖籍多在東觀故使名儒著作其中有其名

而尙未有官明帝時班固傳毅為蘭臺令史與雒陽令陳宗等四人著作東觀皆他官兼著作之名終漢之世又有起居注馬皇后撰禁中起居之類是魏明

帝太和中詔置著作郎一人佐郎一人竝隸中書省衛凱以侍中充著作是中專掌國史亦有他官兼領

書著作郎專修國史而起居注無聞焉吳蜀分據亦各有史職蜀有王崇補東觀吳有左國史薛瑩右國史華覈太史令丁孚韋曜等參撰國書

晉因魏制而中書著作郎雖掌史注亦為兼官著作謂之大著作荀勗以中書監孫盛以秘書監孫綽以散騎常侍竝領著作惠帝元康二年

改中書著作為秘書著作專掌史任隸秘書省後雖署而所佐郎入中書監自哀帝興寧二年省四人別置隸如故

孝武康寧元年復置八人晉制佐著作郎始到必換名臣入傳僭偽諸

國亦有史職前趙劉聰有左國史撰其國君臣紀傳前涼張駿亦令史臣撰國書於東苑後蜀西涼紀事委之門下南涼置國紀祭酒使撰錄時事自餘僞主多置著作官前趙和苞後燕董統之類

是也宋因晉制改佐著作郎為著作佐郎掌國史兼集起居注宋室初建以未有名臣可作傳其制遂廢齊太祖建元二年初置

史官歷梁陳國史起居之任多以他官兼領齊以散騎常侍

檀超驛騎記室江淹掌史職侍中王思遠掌起居注梁周捨為尚書吏部郎掌國史裴子野為著作郎仍兼掌國史及起居注之名自齊梁至陳佐郎多為令僕子起家之選史職率以他官領之後魏置

起居令史每行幸宴會則在御左右記錄帝言及賓客訓答後又別置修起居注二人以他官領之而隸

於集書省北齊別置起居省後周六官之建春官府置外史掌王言及作動之事以為國誌即起居之職也又有著作上士二人中士四人即佐郎之在皆掌綴國錄起居著作之任自此分矣而著作不參史氏隋復置著作郎一人佐郎八人隸秘書省掌國史集注起居場帝置起居舍人二員隸內史省以古有內著作如外史遂置起居官以掌其內焉唐高祖武德初因舊制史官隸秘書省著作局置郎二人佐郎四人太宗貞觀初省起居舍人改置起居郎二人隸門下省省中每日仗臣參議政事令起居郎一人執簡記錄三年別置史館於禁中專掌國

史以他官兼領卑品有才亦以直館命宰臣監修隸門下省著作局始罷領史職是年又於中書置秘書內省以脩五代史高宗顯慶二年置起居舍人二員隸中書省分掌左右龍朔二年改郎為左史舍人為右史咸亨元年復舊武后天授二年又為左右史長壽二年始修時政紀自永徽以後左右史唯得對仗承旨仗下後謀議皆不聞是年宰相姚璹上言以為帝王謀訓不可遂無紀述若不宣自宰相史官疎遠無得而書之遂請仗下後所言軍國政要宰相一神龍初復以左右史為起居郎舍人撰錄為時政紀人每皇帝御殿對立於殿下左郎右舍人有命臨陛聽退而書之以為起居注凡册命啓奏封拜薨免悉載之以明皇開元二十五年移史館於中書省北送史館

以其地切樞密記事附近也憲宗元和四年令登朝
官入館者竝為修撰不過三員官高者一人為判官非登朝者

竝為直館其宰相常以一人監修國史亦有只監修

國史

景龍中以侍中紀處訥中書令楊再思兵部侍郎宋楚客中書侍郎蕭志忠竝修國史頓置四人代宗朝宰相元載憲宗朝宰相齊抗竝兼修國史史官受任于外亦或兼領

史職就治所修撰及有許在家修史者

開元八年以并州大都督

府長史燕國公張說兼修國史齊史本就并州隨軍修撰其後詔說致仕在家修史吳兢遷荆州司馬令就治所修唐書沈傳師湖南觀察使齊憲宗實錄就領修撰五代官局因循無改

原夫史氏之職肇於上世所以記人君之言動載邦

國之美惡著為典式垂之來裔申褒貶之微旨為懲

勸之大法故其司筆削之任慎良直之選歷代審官

莫斯為重今之所紀者凡推擇簡任之尤異討論撰

述之始末家世職業之嗣掌揚摧讐對之裁議冲識

方正以無忒恩遇寵待而隆厚威用標次以彰厥善

其有疎畧差戾受嗤於作者構虛失實有紊乎書法

乃至以鄙淺之識貽叨據之誚亦用參紀申儆于後

其有注錄之部次譜籍之名學方志之辨析世績之

敷述皆司籍之事資博聞之益咸用綴緝以成倫要

凡國史部十有三門

選任

公正

恩獎

自軒轅之世卽置史官蒼頡沮誦實居其職爾後夏終商摯周任佚籀秦胡毋氏漢司馬遷皆司記事之任竝有良史之目逮于後漢乃命鴻碩入直東觀撰述國史謂之著作歷代而下其選彌重或以文學爲時主之稱或以才識因名臣之薦至有成書於外郡終老於冊府其所寄任亦可知也然則胡毋而上不聞司馬父子是謂私作今之論著以班固爲之首後漢班固明帝時爲蘭臺令史與前睢陽令陳宗長陵令尹敏司隸從事孟冀共成世祖本紀遷爲郎典

校秘書固又撰功臣平林新市公孫述事作列傳載紀二十八篇奏之帝乃復使終成前所著書

劉珍安帝時爲謁者僕射永寧元年詔珍與校書劉駒駘作建武以來名臣傳

李尤爲諫議大夫受詔與謁者僕射劉珍等俱撰漢記

劉駒駘臨邑侯復子也駒駘及從兄平望侯毅竝有才學永寧中鄧太后召毅及駒駘入東觀與謁者僕射劉珍著中興以下名臣烈士傳

張衡字平子南陽人少善屬文安帝雅聞衡善術學

選任

公車特徵拜郎中再遷為太史令順帝初再轉復為太史令自去史職五載復還先是永初中謁者僕射劉珍校書郎劉駒駘等著作東觀撰著漢記因定漢家禮儀上言請衡參論其事會病卒

馬融桓帝時為南郡太守免官復拜議郎在東觀著述

邊韶字孝先陳留浚儀人以文學知名桓帝時為臨潁侯相徵拜太中大夫著作東觀

伏無忌為侍中屯騎校尉元嘉中詔無忌與黃景崔寔等共撰漢記

崔寔為大將軍梁冀司馬與邊韶延篤等著作東觀

延篤傳又載篤為議郎與朱穆邊韶共著作東觀

楊彪靈帝嘉平中以博習舊聞公車徵拜議郎與馬日磾盧植蔡邕等著作東觀

荀悅為黃門侍郎獻帝好典籍嘗以班固漢書文繁難省乃令悅依左氏傳體以為漢紀三十篇詔尚書給筆札辭約事詳論辨多美

吳章躍為黃門侍郎廢帝即位諸葛恪輔政表躍為太史令撰吳書

華覈為左國史後主時覈上疏曰臣聞五帝三王皆

册府元龜 選任 卷之五百五十四

立史官敘錄功美垂之無窮漢時司馬遷班固咸命世大才所撰精妙與六經俱傳大吳受命建國南土大皇帝末年命太史令丁孚郎中項峻俱非史才其所撰作不足紀錄至少帝時更差韋曜周昭薛瑩梁廣及臣五人訪求往事所共撰立備有本末昭廣先亡曜負恩蹈罪瑩出為將復以過徙其書遂委滯迄今未撰奏臣愚淺才劣適可為瑩筭記注而已若使撰合必襲乎峻之跡懼墜大皇帝之元功損當時之盛美瑩涉學既博文章尤妙同寮之中瑩為冠首今見吏雖多經學記述之才如瑩者少是以悽悽為國

惜之實欲使卒垂成之功編於前史之末奏上之後退填溝壑無所復恨後主遂召瑩還為左國史晉傅玄魏末為郎中與東海繆施俱以時譽選入著作撰集魏書華嶠惠帝元康初為尚書後以嶠博聞多識屬書典實有良史之志轉秘書監中書散騎著作及治禮音律天文數術南省文章門下撰集皆典統之華暢嶠少子也嶠漢書十典未成秘書監繆徵奏暢為著作佐郎卒成十典虞預為著作郎除散騎嘗侍仍領著作著晉書四十

册府元龜 國史部 卷之五百五十四 八

餘卷

于寶為著作郎時中興草創未置史官中書監王遵
 上疏曰夫帝王之迹莫不秘書著為令典垂之無窮
 宣皇帝廓定四海武皇帝受禪于魏至德大勳等蹤
 上聖而紀傳不存於王府德音未被乎管絃陛下聖
 明當中興之盛宜建立國史撰集帝紀上敷祖宗之
 烈下紀佐命之勳務以實錄為後代之準厭率土之
 望悅人神之心斯誠雍熙之至美王者之弘基也宜
 備史官勃佐著作郎于寶等漸就撰集元帝納焉寶
 於是始領國史

王隱字處叔陳郡人建興中過江太興初元帝召隱
 及郭璞俱為著作郎令撰晉史

朱鳳晉陵人吳震吳人單族有史才秘書監華譚薦
 二人擢補著作佐郎並皆稱職

謝沉除尚書度支郎何充庾冰並稱沉有史才遷著
 作郎撰晉書三十餘卷

徐廣東莞人孝武時為員外散騎嘗侍領著作尚書
 奏曰左史述言右官書事秉志顯於晉鄭春秋著乎

魯文自聖代有造中興記者道風帝典煥乎史策而
 太和以降世歷三朝玄風聖迹儵為疇古臣等參詳

宏勅著作郎徐廣撰成國史於是勅廣撰集焉遷驍
騎將軍領徐州大中正轉正員嘗侍大司農仍領著
作如故勒成晉紀上之因乞解史任不許
宋王韶之琅邪臨沂人私撰晉陽秋成時人謂之宏
居史職即除著作郎使續後事

裴松之為尚書部郎仁威記室參軍出為諸暨令元
嘉中受詔續何承天宋史未及成而卒

何承天元嘉十六年除著作佐郎撰國史

荀伯子少好學博覽經傳為員外散騎侍郎著作郎
徐廣重其才學舉伯子及王韶之並為佐郎助撰晉

史

南齊丘巨源少舉丹陽郡孝廉為宋武所知大明五

年勅助徐爰撰國史

檀超為散騎嘗侍司徒右長史建元二年初置史官

以超與驃騎記室江淹掌史職

王思遠高宗時為侍中掌優策及起居注

梁任孝恭以外祖丘它與高祖有舊高祖聞其有才

學召入西省撰史

裴子野撰宋畧成吏部尚書徐勉言之於高祖以為
著作郎掌國史及起居注除通直正員外郎著作如

故勅使撰方國使圖
周興嗣天監中為員外散騎侍郎佐撰國史十二年
遷給事中撰史如故

劉沓天監初為太學博士佐周捨撰國史至大通初
為東宮通事舍人勅代裴子野知著作郎

陸雲公為尚書儀曹郎頃之即入直壽光省以本官
知著作郎事俄除著作郎累遷中書黃門郎並掌著
作

沈峻為五經博士時中書舍人賀琛奉勅撰梁史乃
啓峻及孔子祛補西省學士助撰錄書成入兼中書

通事舍人

後魏鄧穎為中書侍郎太武詔太嘗崔浩集諸文學
撰述國書穎與浩弟覽等俱參著作事

崔浩為光祿大夫太武詔浩曰昔皇祚之興世隆北
土積德累仁多歷年載澤流蒼生義聞四海我太祖
道武皇帝協順天人以征不服應期撥亂奄有區夏
太宗承統光隆前緒釐正刑典大業維新然荒域之
外猶未賓服此祖宗之遺志而貽功于後也朕以眇
年獲奉宗廟戰戰兢兢如臨深谷故即位之初不遑
寧處揚威朔裔掃定赫連逮于神麋始命史職注集

前功以成一代之典自爾以來戎旗仍舉秦隴尅定徐兗無塵平遁寇於龍川討孽豎於涼域豈朕一人獲濟於此賴宗廟之靈群公卿士宣力之効也而史闕其職篇籍不著每懼斯事之墜焉公德冠朝列言為世範小大之任望君存之命公留臺綜理史務述成此書務從實錄浩於是監秘書事以中書侍郎高允散騎侍郎張偉參著作續成前紀至於損益褒貶折衷潤色浩所摠焉

高允與司徒崔浩述成國記以本官領著作郎

陰仲達武威姑臧人少以文學知名司徒崔浩啓仲

達與段承根云二人俱涼土才華同修國史除秘書著作郎

段承根好學機辯有文思而性疎薄司徒崔浩見而奇之以為才堪著述言之太武請為著作郎引以同事

高讜為游擊將軍與崔浩共參著作遷中書侍郎程駿為著作郎獻文皇帝中除密郡太守尚書李敷奏曰夫君之使臣必須終効駿實史才方申直筆千里之任十室可有請留之數載以成前籍後授方伯愚以為允書奏從之

李輔字伯尚少有重名孝文每云此李氏之千里駒
勅撰太宗起居注尋遷秘書丞

韓顯宗爲著作郎孝文曾謂顯宗及程靈虬曰著作
之任國言是司卿等之才朕自委悉中省之品卿等
所聞若取之古人班馬之徒固自遼闊若求當代文
學之能卿等應推崔孝田

袁翻少以才學擅美一時宣武景明初李彪在東觀
翻爲徐紇所薦彪引兼著作佐郎以參史事

游雅字伯度爲東雍州刺史徵爲秘書監委以國史
之任

崔光本名孝伯字長仁爲著作郎與秘書丞李彪參
撰國書宣武初爲侍郎初光與李彪共撰國書太和
之末彪改著作專以史事任光彪尋以罪廢宣武居
諒闇彪上表求成魏書詔許之彪遂以白衣於秘書
省著述光雖領史官以彪意在專功表解侍中著作
以讓彪宣武不許
李彪字道固爲秘書丞分領著作事
于忠爲衛尉卿詔與吏部尙書元暉度支尙書元康
河南尹元萇等推定歷代姓族
李琰之爲彭城王勰行臺參軍尋爲侍中李彪啓著

作郎修國史累轉黃門郎修國史
房景先為員外郎侍中穆紹啓景先撰世宗起居注
陽休之莊宗時為輕車將軍李神雋監起居注休之
與河東裴伯茂范陽盧元明河間邢子明等俱入撰
次後為太保長孫稚府屬尋勅與魏收李同軌等修
國史
北齊杜臺卿字少山文筆尤工見稱當世以中書黃
門侍郎兼大著作修國史
魏收字伯起後魏節閔時為散騎侍郎尋勅典起居
注并修國史後為神武府屬崔暹言於文襄曰國史

事重公家父子霸王功業皆須具載非收不可文襄
啓收兼散騎常侍修國史武定二年除正常侍領兼
中書侍郎仍修史神武謂收曰卿勿見陳元康等在
吾目下趨走謂吾以為勤勞我世身名在卿手勿謂
我不知尋加兼著作郎天祐元年除中書令兼著作
郎二年詔撰魏史帝使收專其任又詔平原王高隆
之總監之署名而已帝勅收曰好直筆我終不作魏
太武誅史官
孫搴字彥舉少厲志勤學為國子助教太保崔光引
修國史

權會文義該洽兼明風角玄象被尚書符追著作修國史監知太史局事

後周柳虬為秘書丞時秘書雖領著作不參史事自虬為丞始令監掌焉

隋姚察仕陳累遷戎昭將軍知撰梁史事後主篡業勅兼東宮通事舍人將軍知撰史如故高祖開皇九年詔授秘書丞別勅成梁陳二代史

薛德音道衡之從子有雋才起家為游騎尉佐魏澹

修魏史成遷著作郎

劉炫河間人少以聰敏見稱為郡禮曹從事以吏幹

知名奉勅與著作郎王劭同修國史

初劭為著作佐郎以母憂去職

在家著齊書時制禁私撰史為內史侍郎李元操所奏帝怒遣使收其書覽而悅之於是起為員外散騎

侍郎修起居注

劉焯以儒學知名舉秀才射策甲科與著作郎王劭

同修國史

潘徽為晉王楊州博士煬帝嗣位詔徽與著作佐郎

陸從典太常博士褚亮歐陽詢等助越公楊素撰魏

書會素薨而止

唐蕭瑀為中書令武德五年十二月詔曰司典序言

史官記事考論得失究盡變通所以裁成義類懲惡

勸善多識前古貽鑒將來伏羲以降周秦斯及兩漢相傳三國竝命迄于晉宋載籍備焉自有魏南徙乘機撫運周隋禪代歷世相仍梁氏稱邦跨據淮海齊遷龜鼎陳建宗祊莫不自命正朔縣歷歲祀各殊徽號刪定禮儀至於發跡開基受終告代嘉謀善政名臣奇士立言著績無乏於時然簡牘未編紀傳咸闕炎涼已積謠俗遷訛餘烈遺風泯焉將墜朕握圖馭宇長世字民方立典謨永垂憲則顧彼湮落用深軫悼有懷撰次實資良直中書令蕭瑀給事中王敬業著作郎殷聞禮可修魏史侍中陳叔達秘書丞令狐

德棻太史庾儉可修周史兼中書令封德彝中書舍人顏師古可修隋史大理卿崔善為中書舍人孔紹安太子洗馬蕭德言可修梁史太子詹事裴矩兼吏部郎中祖孝孫前秘書監魏徵可修齊史秘書監竇璡給事中歐陽詢秦王文學姚思廉可修陳史務加詳覈博採舊文義在不刊書法無隱
房玄齡為司空貞觀二十年詔宐令修國史所更撰晉書詮次舊文裁成義類俾夫湮落之謬咸使發明其有所須可依修五代史故事若少學士亦量追取於是房玄齡與中書令褚遂良太子左庶子許敬宗

掌其事又召中書舍人來濟著作郎陸元仕劉子翼
 守主客郎中盧承基太史令李淳風太子舍人李義
 府薛元超起居郎上官儀主客員外郎崔行功刑部
 員外郎辛亥馭著作佐郎劉喬之光祿主簿楊仁卿
 御史主簿李延壽校書郎張文恭並當時屬文士分
 功撰錄
 許敬宗為中書令敬宗先受詔與中書侍郎許圜師
 太史令李淳風著作佐郎楊仁卿著作郎顧喬等撰
 貞觀二十三年已後至顯慶三年實錄顯慶四年二
 月撰成二十卷

劉仁軌為左庶子同中書門下三品咸亨四年三月
 詔仁軌與吏部侍郎同中書門下三品李敬玄中書
 侍郎郝處俊黃門侍郎高如周等並修國史仁軌等
 於是引左史李仁實專掌其事
 武三思為特進則天長安三年正月勅宣令三思與
 納言李嶠正諫大夫朱敬則司農少卿徐彥伯鳳閣
 舍人魏知古崔融司封郎中徐堅左史劉知幾直史
 館吳兢修唐史採四方之志成一家之言長懸楷則
 以貽勸誡
 魏元忠為中書令神龍元年十二月制左散騎嘗侍

靜德郡王武三思與元忠及禮部尚書祝欽明及史官太嘗少卿徐彥伯秘書少監柳冲國子司業崔融中書舍人岑義徐堅等修則天實錄

吳兢勵志強學博通經史魏元忠朱敬則居相輔薦兢有史才堪居近侍因令直史館修國史累遷右補闕與韋承慶崔融劉子玄撰則天實錄

張說為并州大都督府長史開元八年詔曰肇有書契是興簡冊所以彰平得失示以懲勸非夫詳而有體辨而不華含陽秋之蘊摠墳誥之贖豈能光我司典崇其立言右羽林軍將軍攝御史大夫權檢校并

州大都督府長史持節天平軍節度大使燕國公張說多識前志學于舊史文成微婉詞潤金石諒可以昭振風雅光揚軌訓可兼修國史仍齋史本就并州修撰

柳芳肅宗朝為史官與同職韋述受詔添修吳兢所撰國史未竟而亡
于休烈為工部侍郎修國史宰臣李揆嫉之改為國子祭酒休烈性本淳謹怡然自適代宗即位甄別名品宰臣元載稱之乃拜右散騎常侍依前兼修國史令狐暉博貫群書有口辯楊綰為禮部侍郎修史引

入史館自華原尉拜拾遺累遷禮部侍郎貶衡州別駕貞元初李泌為相召拜右庶子史館修撰又貶吉州別駕監修國史奏峒所換代宗實錄一分請於貶所畢功

張薦字孝舉少精史傳大曆中浙西觀察使李涵表薦其才可掌史任乃詔授左司禦率府兵曹參軍既至關下以母老疾不拜命母喪闋禮部侍郎于劬舉前事以聞召充史館修撰兼陽翟尉累遷工部侍郎卒薦聰明強記無不通貫自始命至嘗兼史館修撰在史館二十餘年

蔣乂初名武貞元九年自前河南府王屋縣尉為右拾遺史館修撰德宗重難其職制未下前召見於延英殿方命官元和四年為秘書少監兼史館修撰奉詔與獨孤郁韋處厚同修德宗實錄

路隨為翰林侍講學士諫議大夫韋處厚為中書舍人長慶二年十月勅隨處厚嘗在史館才行可稱伏以憲宗實錄未修灼資論撰宐兼充史館修撰仍分日入史館修實錄未畢之間且許不入內署仍放朝參

沈傳師為翰林學士中書舍人史館修撰預修憲宗

實錄長慶三年出為湖南觀察使中書侍郎平章事
 監修國史杜元穎奏臣自去年奉詔命各據見在史
 官分修憲宗實錄今緣沈傅師改官若更求人選擇
 非易其沈傅師當分雖搜羅未周條目紀綱已粗有
 緒竊以班固居鄉里而繼成漢書陳壽處私家而專
 精國志玄宗國史張說在本鎮兼修代宗編年令狐
 暉自外郡奏上遠考前代近參本朝皆可明徵實有
 成例其沈傅師一分伏望勅就湖南修畢先送史館
 與諸史官參詳然後聞奏庶使官業責成有終始之
 効傳聞據實無同異之差制可

蔣係父子也太和三年為右拾遺史館修撰與同職
 沈傅師鄭瀚陳夷行李漢等奉詔撰憲宗實錄四年
 書成奏御轉尚書工部員外郎遷本司郎中皆兼史
 職
 宇文籍以咸陽尉直史館與韓愈同成憲宗實錄遷
 監察御史後又為駕部員外郎史職與李處厚路隋
 沈傅師同修憲宗實錄
 王彥威為諫議大夫太和六年二月以彥威及戶部
 郎中楊漢公祠部員外郎蘇滌右補闕裴休並以本
 官充史館修撰
 故事史官不過三員少或止於兩
 員至是四人並命時論深以為非

李讓夷為諫議大夫開成元年四月以讓夷並權知起居舍人事先是宰臣於閣內奏起居舍人李襄有痼疾請替帝曰朕聞褚遂良為諫議大夫嘗兼此官卿可盡言今諫議大夫姓名宰臣李石遂奏李讓夷馮定孫簡蕭叔帝曰讓夷可也

孟穆為戶部郎中大中八年七月監修史鄭郎奏當館修撰直館共四員准故事以通籍者為直館伏以修史重事合選廷臣秩序或卑筆削不其直館伏請停廢更添修撰二員從之其舊直館二年尉張範涇陽尉李節勒守本官以穆及駕部員外郎李渙並充

修撰通舊為四員分修四季之事

蔣偕有史才為補闕史館修撰咸通中與同職盧耽

牛藜等受詔修文宗實錄

柳玘為吏部侍郎昭宗大順中宰相監修國史杜讓能以宣宗懿宗僖宗三朝實錄未修乃奏玘及右補闕裴廷裕左拾遺孫泰駕部員外郎李商太嘗博士鄭光庭等十五人分修之

後唐張昭長興四年七月以前都官員外郎知制誥史館修撰復為尚書職方員外郎依前知制誥著作郎直史館張守吉為右補闕並充史館修撰著作佐

選任

郎尹拙為左拾遺王慎微為右拾遺並依前直史館
國朝舊事以本官直館者皆為畿縣尉今以諫官直
史館自拙等始從監修國史李愚奏也

晉趙瑩為相監修國史天福六年二月勅曰有唐遠
自高祖下暨明宗紀傳未分書志或闕今耳目相接
尚可詢求若歲月更深何由尋訪宜令戶部侍郎張
昭起居郎賈緯秘書少監趙熙吏部侍郎鄭受益左
司員外郎李為光等修撰唐史仍令宰臣趙瑩監修
其年四月瑩奏所修唐史首尾二十一朝縣歷三百
餘載其於筆削斯實難辦必藉群才司分事任張昭

等五人奉勅同撰內起居郎賈緯丁憂去官竊以刑
部侍郎呂琦侍御史尹拙皆富典墳嘗親簡牘勸善
懲惡雅符班馬之規廣記備言必稱董南之職上所
聖鑒俾共編修詔從之以琦為戶部侍郎以拙為倉
部員外郎與張昭等同修唐史
漢賈緯為諫議大夫乾祐二年二月勅曰載唐虞之
盛傳彼古文明得失之由存乎信史恭惟高祖皇帝
受天曆數續漢基圖戎虜蠻夷懾靈旗而內附禮樂
征伐建王道於大中功格於上玄化行乎率土將欲
示其軌範約彼春秋接高光紀聖之書續班馬紀言

之典廢而不舉闕孰甚焉左諫議大夫賈緯左拾遺
 竇儼右拾遺王紳等才學淵深論辯蜂起分職方提
 於直筆編年允屬於鴻儒宐令緯等同修高祖實錄
 呈進仍令宰臣蘇逢吉監修平定史恭節高祖聖皇
 周張昭為兵部尚書顯德三年十二月勅太祖聖皇
 帝實錄并梁均帝唐清泰二主實錄宐差張昭修宐
 同修官委張昭定名奏請四年正月昭上言奉勅編
 修太祖實錄及唐梁二末主實錄今請國子祭酒尹
 拙太子詹事劉溫叟同於史館編修

帝五人公正

夫簡牘之興得失攸紀善惡無隱曲直遂分是故勸
 沮於斯人見信於來裔其或紀言動之任舉春秋之
 旨雖微婉之斯在亦繼介之必書故使哿矣之言足
 徵於龜鑑直哉之筆若列於日星斯蓋得執簡之餘
 芳書法之遺懿者已

董狐為晉太史晉趙穿襲殺靈公於桃園虞翻曰而
 迎趙盾趙盾素貴得民知靈公少侈民不附故為弑
 君盾復位晉太史董狐書曰趙盾弑其君以視於朝
 盾曰弑者趙穿我無罪太史曰子正卿而亡不出境
 父不能誅國亂非子而誰孔子聞之曰董狐古之良

史書法不隱不隱盾之罪宣子良大夫也為法受惡聞義則服

杜預曰言其為法受屈也惜也出疆乃免

齊太史失姓崔杼弑其君莊公光立景公而相之太

史書曰崔杼弑其君崔子殺之其弟嗣書而死者二

人嗣續也并前其弟又書乃舍之南史氏聞太史盡

死執簡以往聞既書矣乃還傳言齊有史崔杼之罪所以聞

吳韋曜為孫皓侍中領任國史皓欲為父和作紀曜

執以和不登帝位宐名為傳如是者非一漸見責怒

晉孫盛歷著作郎秘書監著晉陽秋詞直理正稱良

史焉既而大司馬桓溫見之怒謂盛子曰枋頭誠為

失利何至乃如尊君所說若此史遂行自是關君門

戶事其子遽拜謝因請刪改之時盛年老還家性方

嚴有軌憲雖子孫班白而庭訓愈峻至此諸子乃共

號泣稽顙請為百口切計盛大怒諸子遂爾改之盛

寫兩定本寄于慕容雋大元中孝武帝博求異聞始

於遼東得之以相考校多有不同書遂兩存焉

趙泉車敬俱為符堅著作郎堅母少寡將軍李威有

辟陽之寵史官載之堅收起居注及著作所錄而觀

之見其事慙怒乃焚其書而大檢史官將加其罪泉

敬等已死乃止

宋王韶之為黃門侍郎領著作韶之為晉史序王詢
貨殖王欽作亂詢子弘欽子華竝貴韶之懼為所陷
深結徐羨之傅亮南齊劉祥為長沙王鎮軍權諮議
叅軍撰宋書譏斥禪代尚書令王儉密以啓聞帝銜
而不問

後周柳虬為西魏祕書監修起居注太祖既廢魏帝
立恭帝大饗群臣虬執簡書於朝曰廢帝文皇帝之
嗣子年七歲文帝言於安定公即周太祖曰是子才繇于
公不才亦繇于公宐勉之公既受茲重寄居元輔之
任又納女為皇后遂不能訓誨有成致令廢黜負文

皇帝付囑之意此咎非安定公而誰太祖乃令太嘗
盧辨作誥諭公卿曰嗚呼我群后暨衆士維文皇帝
以襁褓之嗣托於予訓之誨之庶厥有成而予罔能
弗變厥心庸此乎廢墜我文皇帝之志嗚呼茲咎予
其焉避予實知之矧爾衆人之心哉惟予之顏豈惟
今厚將恐來世以予為口實
唐杜正倫太宗貞觀二年為給事中兼知起居注太
宗嘗謂侍臣曰朕每日坐朝欲出一言即思此言於
百姓有利益不所以不敢多言正倫進曰君舉必書
言存左史臣職當修起居注不敢不盡愚直陛下若

一言乖於道理則千載累於聖德非直當今有損於百姓願陛下慎之太宗大悅賜綵絹二百疋

褚遂良為諫議大夫知起居注貞觀十六年四月太宗謂遂良曰卿知起居注書何等事大抵人君得見否遂良曰今之起居古之左右史書人君言事且記善惡以為鑒誠庶幾人主不為非法不聞帝王躬自觀史太宗曰朕有不善卿必記之耶遂良曰守道不如守官臣職當載筆君舉必記黃門侍郎劉洎曰設令遂良不記天下之人皆記之矣太宗曰然七月太宗又謂遂良曰爾知起居比來記我行事善惡遂良

曰今四海太平為行事耳然史官之設君舉必書善既必書過亦無隱

吳兢開元中為著作郎兼修史時黃門侍郎同中書門下平章事張說因至史館讀則天實錄見論證對

魏元忠事乃謂兢曰劉五修實錄

劉五即子玄也論齊魏公

事殊不相饒假與說毒手當時說驗知是兢書之所以假託於劉子玄兢從容對曰是兢書之非劉公修述草本猶在其人已亡不可誣枉於幽魂令相公有怪耳同修史官蘇宋等見兢此對深驚異之乃歎曰若取人情何名為直筆

于休烈為太嘗少卿修國史至德二年肅宗謂休烈曰君舉必書朕有過卿書之否休烈對曰臣聞禹湯罪已其興勃焉有德之君不忘書過臣不勝大慶鄭朗為起居郎太和九年十二月文宗御紫宸殿與宰臣鄭覃李石等議政宰臣既退帝命朗等適所記錄者將來一觀朗對曰臣執筆所記便目為史臣聞自古帝王不合觀史帝曰故事何在朗曰臣不敢遠徵故實嘗聞太宗皇帝欲親覽國史用知得失諫議大夫朱子奢上表云史官所述義歸盡善若至曾玄已後或非上智中至庸君飾非護短見極陳善惡恐

致史官何地逃刑又聞褚遂良對曰今之起居古之左右史以記人君言行善惡必書庶幾不為非法不聞帝王躬自觀史帝又謂朗曰適來所記是且直書未有否臧一見無爽朗乃進所紀帝略覽曰卿室門外重寫錄進來其日晚內出詔宣示宰臣曰適來鄭朗等奏朝來所紀之事擬不進本人君之言良史善惡必書或有平生之閑話不關理道之體要垂諸將來實為愧恥異日臨朝庶幾稍改何妨一見見臧醜言

魏謩為起居舍人開成四年十月文宗於紫宸殿對

百寮遣閣門使就暮取注記暮奏曰臣以自古置此以爲聖王鑒戒陛下但爲善事勿冀臣不書如陛下所行錯誤臣不書之天下之人皆得書之臣以陛下爲太宗文皇帝乞陛下許臣比職褚遂良帝曰我向前亦曾取看暮曰自是向前起居不詳故事臣今豈得陷陛下爲非若陛下一覽之後自此文字須有迴避如此則善惡不直非史也遣後代何取信遂止

恩獎

軒后以史名官晉卿因籍命氏文籍旣興官守攸重其所繇來遠矣逮乎漢氏之世則天下計書先上太

史副上丞相其後列鴻都藏室之署分東觀祕府之局典司著撰裁正編簡鼎國江左以迄于五代未嘗不建官分職克慎其選焉蓋髦士俊民乘時間作而當世之君莫不隆其禮命形於詔獎或蕃錫加等或崇進異數以至推恩而延賞追美以飾終發乎嘆想形於悼惜蓋夫鴻碩之老良直之士所任重而其才難不可以不欽尚者

後漢高彪除郎中授書東觀遷內黃令帝勅同僚臨送祖于上東門詔東觀畫彪形像以勸學者

吳華覈遷東觀令領右國史覈上疏辭讓後主咨曰

得表以東觀儒林之府當講校文藝處定疑難時皆名學碩儒乃任其職乞更選英賢聞之以卿研精墳典博覽多聞可謂悅禮樂敦詩書者也當飛翰騁藻光贊時事以越楊班張蔡之疇怪乃謙光厚自菲薄空勉修所職以邁先賢勿復紛紛

梁蕭子雲爲太子舍人換東宮新記奏之勅賜束帛陳杜之偉爲大匠卿遷太中大夫仍勅換梁史永定三年卒高祖甚悼惜之詔贈通直散騎嘗侍賻錢五萬布五十疋棺一具尅日舉哀

後魏韓顯宗爲著作佐郎孝文曾謂顯宗及程靈虬

曰著作之任國書是司卿等之文朕自委悉中省之品卿等所聞若欲取况古人班馬之徒固自遼闊若求之當世文學之能卿等應推崔孝伯又謂顯宗曰見卿所撰燕志及在齊詠大勝比來之文

北齊魏收散騎嘗侍修國史武定三年除正嘗侍領兼中書侍郎仍修史神武謂收曰卿勿見陳元康等在吾目下趨走謂吾以爲勤勞我世身名在卿手勿謂我不知尋加兼著作郎

隋郎茂大業中爲尚書左丞撰州都圖經一百卷奏之賜帛三百段

裴矩為吏部尚書大業初西域諸蕃塞與中國互市
煬帝遣矩監其事矩撰西域圖三卷入朝奏之帝大
悅賜物五百段

唐房玄齡為左僕射貞觀十年正月與侍中魏徵散
騎嘗侍姚思廉太子右庶子李百藥孔穎達守禮部
侍郎令狐德棻守中書侍郎岑文本中書舍人許敬
宗等撰成周隋陳齊梁等五代史詣闕上之太宗勞
之曰朕觀前代史書彰善癉惡是為將來之戒秦始
皇奢淫無度志存隱惡焚書坑儒用緘談者之口隋
煬帝雖好文儒尤疾學者前世史籍竟無所成數代

之事殆將泯絕朕意則不然將欲覽前王之得失為
在身之龜鏡公輩以數年之間勒成五代之史深副
朕懷極可嘉尚於是進級班賜各有差
高士廉為吏部尚書貞觀十二年與黃門侍郎韋挺
禮部侍郎令狐德棻兼中書侍郎岑文本撰氏族百
卷太宗稱善頒賜進級各有差
敬播為著作郎與司空房玄齡給事中許敬宗貞觀
十七年上所撰高祖今上實錄各二十卷玄齡以下
班賜進級各有差
褚遂良為中書令貞觀二十年詔修晉書以司空房

玄齡及遂良太子左庶子許敬宗掌其事又詔中書舍人來濟著作郎陸元仕劉子翼守主客郎中盧承基太史李淳風太子舍人李義府薛元超起居郎上官儀主客員外郎崔行功刑部員外郎辛亥馭著作佐郎劉喬之光祿主簿楊仁卿御史主簿李延壽校書郎張文恭並當時屬文之士分功撰錄莫不博考前文傍求遺逸芟夷繁雜舉其精要又令前雅州刺史令狐德棻太子司議郎敬播主客員外郎李懷安屯田員外郎李懷儼詳其條例重加考正以臧榮緒晉書爲本摭摭諸家傳記而附益之數載而書就頒

賜加級各有差

長孫無忌爲太尉受詔與史官同續修貞觀實錄永徽五年閏五月畢功詣闕表上之起貞觀十五年至二十三年五月勒成二十卷帝覽而歎歎無忌等賜爵加級布帛各有差
于志寧爲太子太傅尚書左僕射先詔太尉長孫無忌與志寧及中書令兼太子詹事崔敦禮與禮官國子祭酒崇賢館文士令狐德棻中書侍郎兼檢校右庶子弘文館學士李義府著作郎崇賢館學士劉喬之著作郎楊仁卿起居郎弘文館直學士顧喬符璽

郎李延壽兼秘書郎弘文館直學士張文恭等修撰國史依紀傳之體凡八十一卷顯慶元年七月勒成無忌等詣闕上之詔無忌已下加爵賜布有差許敬宗爲中書令與中書侍郎許圜師著作郎楊仁卿等受詔撰貞觀二十三年以後至顯慶三年至公凡成二十卷顯慶四年二月畢功奏上之封敬宗子曰爲新城縣男國子祭酒令狐德棻進封彭陽縣公中書侍郎許圜師封平恩縣公太史令李淳風封昌樂縣男著作郎北平縣男楊仁卿著作郎餘杭縣男顧喬竝加朝議大夫竝賞修實錄之功也

李延壽爲符璽郎撰南北史一百八十卷卒高宗詔曰故符璽郎李延壽藝文該洽材兼良史撰政典一部詞殫直筆雖其人已亡功有可錄宐賜其家絹五十疋仍令詳正所寫兩本付秘書一本賜皇太子武三思爲左散騎嘗侍靜德郡王與中書令齊國公魏元忠禮部尙書魯郡公祝欽明及史官太嘗少卿徐彥伯秘書少監柳冲韋承慶國子司業崔融中書舍人岑羲徐堅撰則天大聖皇后實錄爲三十卷編次文集一百二十卷神龍二年五月奏之帝稱善降璽書勞問三思賜物二千段魏元忠賜物千段仍封

其子衛王諮議參軍昇為任城縣男祝欽明進爵魯國公賜物八百段徐彥伯等各賜爵二等賚物五百段
 賚懷貞為左僕射與侍中魏知古中書令蕭至忠崔湜中書侍郎陸象先左散騎常侍柳冲太子詹事徐堅左庶子劉子玄先天二年三月奏上所修姓族系錄二百卷懷貞已下加爵賜物各有差
 劉子玄為左散騎嘗侍修國史開元四年與吳兢撰則天實錄四十卷成以聞又引古義白於執政宰相姚崇奏曰伏見貞觀十七年監修國史房玄齡與史

官給事中許敬宗著作佐郎敬播修高祖實錄二十卷成制封玄齡一子為縣男賜物一千段敬宗一子為高陽縣男賜物七百段敬播授太子司議郎賜物五百段仍並降璽書褒美又神龍二年五月監修國史中書令魏元忠與史官太常少卿徐彥伯國子司業崔融等修則天實錄三十卷成制封元忠一子為縣男賜物一千段彥伯等各賜爵二等物五百段自餘卑官加兩階物段准處分仍並降璽書褒美今史官劉子玄吳兢等撰睿宗實錄又重修則天中宗實錄並成進訖准撰太宗實錄例益修官已下加爵

及賜命子玄等經臣援引古今欲臣聞奏臣謹尋故事例有恩賞事屬當時不可為准子玄等始末修撰誠亦勤勞敘事紀言所緣雖重承恩賞賜固不在多子玄吳兢望各賜物一百段許之

一云子玄以修則天實錄封言巢縣

子

吳兢神龍中與韋承慶劉子玄等撰則天實錄成轉起居郎俄遷水部郎中丁憂還鄉里開元三年服闋抗疏言曰臣先修史已成數十卷自停職家貧無紙札乞終餘功乃拜諫議大夫依前修史開元六年七月表乞典郡曰臣自掌史東觀十有七年歲序徒淹

勤勞莫著不能勒成大典垂誠將來顧省微躬久好賢路乞罷今職別就他官至於治人之政在兢尤所詳曉望令試典一郡刺舉外臺必當効績循良不負朝寄又兢父致仕已來俸料斯絕所冀祿秩稍厚其脆有資烏鳥之誠幸垂矜察帝親札報曰天子臨書是為盛業史官秉筆必佇良才著作彊記洽聞時議咸許牧州典郡此類何求豈轉要以從閑乃迴難而就易私願或愜公道若何八年詔其父鄭州長史處敬為鳳州刺史仍聽致仕以兢修國史故也
賈耽為宰相貞元十四年耽獻九州圖并別錄通錄

十卷德宗賜內厩馬一匹錦綵二百疋銀餅盤各一十七事耽又上海內華夷圖及古今郡國縣道四夷述德宗覽而善之賜錦綵二百疋袍段六錦帳二銀餅盤各一銀榼二馬一匹

令狐峒為起居舍人撰玄宗代宗實錄順宗初卒元和三年以修實錄功追贈工部尚書

裴垕監修國史元和五年十二月與諸史官進德宗實錄五十卷憲宗覽而稱善乃賜垕繒錦三百疋及

器等以秘書少監史館修撰蔣武後名為諫議大

直史館密縣尉樊紳為左拾遺內供奉咸陽縣尉

韋處厚為右拾遺內供奉萬年縣丞林寶為太常博士竝仍舊職

李吉甫為宰相元和八年二月進所撰元和州郡圖三十卷賜錦綵二百疋銀碗盤各一

路隨為翰林侍講學士諫議大夫韋處厚為中書舍人長慶二年十月勅隨等嘗在史館才行可稱伏以

憲宗實錄未修切資論撰宐兼史館修撰其學士如故又勅路隨韋處厚且止後分日入史館修實錄未

畢之間且許不入內署仍放朝參至太和四年三月隨以宰相監修國史表上憲宗實錄賜隨及見在史

史官司封郎中蘇景喬起居舍人陳夷行屯田員外郎李漢右拾遺蔣係各錦綵銀器有差
王彥威爲戶部侍郎判度支撰唐典自武德終永貞成一部七十卷文宗嘉之賜以錦綵銀器
李紳爲宰相監修國史會昌三年與修撰官鄭亞等再修憲宗實錄畢進上賜銀器錦綵有差
魏謩爲中書侍郎平章事監修國史大中八年修文宗實錄四十卷上之史官給事中盧耽太常少卿蔣偕司勳員外郎王諷右補闕盧告膳部員外牛藁皆頒賜銀器錦綵序遷職秩

後唐趙鳳爲宰相監修國史天成四年上新修懿祖獻祖太祖紀年錄共二十卷莊宗實錄三十卷鳳及修撰張昭遠呂咸休各賜繒綵銀器等
晉姚顛後唐門下侍郎平章事監修國史清泰三年上明宗實錄三十卷同修撰官中書舍人充史館修撰張昭遠授尙書禮部侍郎中書舍人充史館修撰李詳加中大夫上柱國並依前充職戶部郎中充史館修撰程渥授右諫議大夫左拾遺充史館修撰吳承範授左補闕充職右拾遺直史館楊昭儉授殿中侍御史各頒賜有差

漢賈緯仕晉為起居郎天福六年奏曰伏觀史館唐高祖至代宗已有紀傳德宗至文宗亦存實錄武宗至陰濟廢帝凡六代唯有武宗實錄一卷餘皆闕落臣今采訪遺文及耆舊傳說編成六十五卷目為唐年補遺錄以備將來史官修述臣聞裴子野之修宋略爰在梁時姚思廉之纂陳書乃於唐世咸因喪墜景有研尋皇帝陛下與日齊明固天縱聖華山歸馬崇文之道已行虎殿延儒質疑之論斯啓一昨奉宣綸誥精擇史官以李氏受終想唐年遺事雖追名上號其制相沿而創法定儀於文或異恐謠俗之訛變

致信實以湮沉將緝亡書以修墜典臣久居職分深

恥闕遺今錄淺聞別陳短序伏冀特廻睿鑒俯念愚

衷芸閣蓬山誠莫禪於良直蹄涔掬土願少助於高

深請下有司用當取證帝覽之嘉歎賜器皿幣帛

趙熙為兵部郎中天福六年與吏部侍郎張昭受詔

修唐史開運中竟畢其功熙授右諫議大夫昭加金

紫光祿大夫進封開國子增食邑二百戶賞筆削之

功也

一云開運二年史館上新修前朝李氏書賜監修宰臣劉昫修史官張昭直館王仲等繒綵銀

器各有差

周張昭為兵部尚書與太子詹事劉溫叟等顯德五

冊府元龜

恩獎

卷之五百五十四

年撰太祖實錄三十卷上之賜物有差

冊府元龜

冊府元龜

淮南李嗣京奏

西極文翔鳳訂正

豫章黃國琦較釋

國史部

採撰

史氏之職舊矣自周衰失官舊章隳紊仲尼因魯史記之文考其真偽刊而正之以勸戒蓋諸侯之國史也逮司馬遷承重世之業受成書之託繇三五已來上下數千載論次其事為一家之言班范繼踵述遵

冊府元龜

國史部

卷之五百五十四

無廢信乎得良史之體為作者之雄也爾後或被詔
著誤或私為記述乃有特出新意裁成義類追法春
秋繫以時月皆研精極慮各自名家至若煥然垂法
著為國典藏在冊府是謂信史者咸不越子長之矩
矧矣其有述雋賢者舊之美詮高逸貞烈之行第職
官之儀秩摺記載之遺逸敘天官五行之占候紀輶
軒木鐸之方言著為紀傳參於志錄者亦史臣之一
體也咸附出焉

周孔子明王道七十餘君莫能用故西觀周室論史
記舊聞興於魯而次春秋上記隱下至哀之獲麟約

辭文去其煩重以制義法王道備人事浹七十子之
徒口受其傳指為有所譏刺褒諱挹損之文辭不可
以書見也魯君子左丘明懼弟子人人異端各安其
意失其真故因孔子史記具論其語成左氏春秋述
子貢撰越絕書十六卷

尹喜為函關令撰高士老君內傳三卷

鬼谷先生撰老子傳一卷關令尹喜傳一卷
已上並傳記

漢陸賈為大中大夫撰楚漢春秋五卷

司馬遷生龍門龍門山其東則在今秦州龍門縣北
其西則在今同州韓城縣北西河從

其中耕牧河山之陽河之北山
之南也年十歲則誦古文二

十而南遊江淮上會稽探禹穴窺九疑浮沅湘北涉
汝泗講業齊魯之都觀夫子遺風鄉射鄒嶧

鄒縣名也嶧山

也於此行鄉射之禮

困陀蕃薛彭城

蕃縣名也

過梁楚以歸反為太

史令以為漢繼五帝末流接三代絕業周道既廢秦
廢去古文焚滅詩書故明堂石室金櫃玉板圖籍散
亂漢興蕭何次律令韓信申軍法張蒼為章程叔孫
通定禮儀則文學彬彬稍進詩書往往聞出自曹參
薦蓋公言黃老而賈誼晁錯明申韓公孫弘以儒顯
百年之間天下遺文古事靡不畢集太史公仍父子
繼纂其職曰於戲於戲嘆聲余維先人嘗掌斯事顯於唐

虞至於周復典之故司馬氏世主天官至于余乎欽

念哉

欽敬也

罔羅天下放失舊聞王迹所興原始察終

見盛觀衰論考之行事略三代錄秦漢上記軒轅下
至于茲著十二本紀既科條之矣竝時異世年差不
明作十表禮樂損益律歷改易兵權山川鬼神天人
之際承做通變作八書二十八宿環北辰三十輻共
一轂運行無窮言眾星共繞北辰諸輻咸歸車轂若文武之臣尊輔天子也輔弼
股肱之臣配焉忠信行道以奉主上作三十世家扶
義俶儻不令已失時立功名於天下作七十列傳凡
百三十篇五十二萬六千五百字為太史公書序略

以拾遺補闕藝成一家言 藝六藝也 協六經異傳齊百家

雜語藏之名山副在京師 藏于山者備亡失也其以副二本乃留京師也

竢後聖君子遷既死後其書稍出宣帝時遷外孫平

通侯楊惲祖述其書遂宣布焉 又按史記司馬遷自敘云遷父談且卒執

遷手而泣曰今漢興海內一統明主賢君忠臣死義之士余為太史而弗論載余甚懼焉汝其念哉談卒

三歲而遷為太史令故述陶唐以來至于麟止作史記

東方朔為侍郎撰十洲記一卷神異經一卷

劉向為中壘校尉撰戰國策三十卷

楊雄為郎給事黃門撰蜀王本記一卷

後漢班彪為司徒掾才高而好述作遂專心史籍之

間武帝時司馬遷著作史記自太初以後闕而不錄

後好事者頗或綴集時事然多鄙俗不足以踵繼其

書 好事者謂楊雄劉歆陽城 彪乃繼採前史遺事傍

衡褚少孫史孝山之徒 貫異聞作後傳數十篇班彪卒子固歸鄉里固以彪

所續前史未詳乃潛精研思欲就其業既而有人上

書顯宗告固私改作國史者有詔下郡收繫京兆獄

盡取其家書先是扶風人蘇郎偽言圖讖事下獄死

固弟超恐固為郡所覈考不能自明乃馳詣闕上書

得名見具言固所著述意而郡亦上其書顯宗甚奇

之名詣校書郎除蘭臺令史與前睢陽令陳宗長陵

令尹敏司隸從事孟異共成世祖本紀遷為郎典校
 秘書固又撰功臣平林新市公孫述事作列傳載記
 一十八篇奏之帝乃復使終成前所著書固謂自古
 書契之作而有史官其載籍博矣至孔氏纂之斷唐
 堯下訖秦穆唐虞以前雖遺文其語不經非經典所說故
 言黃帝顓頊之事未可明也及孔子因魯史記而作
 春秋而左丘明論輯其本是以為之傳又纂異同為
 國語又有世本錄黃帝以來至春秋時帝王公侯卿
 大夫祖世所出春秋之後七國並爭秦兼諸侯有戰
 國策漢興代秦定天下有楚漢春秋故司馬遷據左

氏國語采世本戰國策述楚漢春秋接其後事訖于
 大漢漢紹堯運以建帝業至於六世史臣乃追述功
 德私作本紀編於百王之末廁於秦項之列太初以
 後闕而不錄故採纂前記綴輯所聞以述漢書起元
 高祖終於孝平王莽之誅十有二世二百三十年綜
 其行事旁貫五經上下治道為春秋考紀春秋考紀謂帝紀也
 表志傳凡百篇固自永平中始受詔潛精積思二十
 餘年至建初中乃成當世甚重其書學者莫不諷誦
 焉又固記諸國風土人俗皆已詳備前書撰建武以
 後其事異於先者以為西域傳皆安帝命班勇所記

云

蔡邕靈帝時爲議郎在東觀與盧植韓說等撰補後漢記會遭事流離不及得成及徙朔方居五原因上書自陳奏其所著十意曰朔方髡鉗徒臣邕稽首再拜上書皇帝陛下臣邕被受陛下尤懇異大恩初繇宰府備數典域以叔父故衛尉質時爲尚書召拜郎中受詔詣東觀著作遂與群儒竝拜議郎沐浴恩澤承答聖問前後六年質奉機密趨走目下遂竟端右出相好藩還尹輦轂旬日之間登躡上列父子一門兼受恩寵不能輸寫心力以効絲髮之功一旦被章

陷沒辜戮陛下天地之德不忍刀鋸裁臣首領得就于罪父子家屬徙充邊方完全軀命喘息相隨非臣無狀所敢復望非臣罪惡所當復蒙非臣辭筆所能復陳臣初決罪洛陽詔獄生出宇戶顧念元初中故尚書郎張俊坐漏泄事當伏重刑已出穀門復聽讀鞫詔書馳救一等輸作左校俊上書謝恩以轉徙郡縣促遣徧於吏手不得頓息含辭抱悲無由上達既到徙所乘塞守烽職在候望憂怖焦灼無心復能操筆成章致草闕庭誠知聖朝不責臣謝但愚心有所不竟臣自在布衣嘗以爲漢書十志下盡王莽而世

祖以來唯有紀傳無續志者臣所事師故太傅胡廣知臣頗識其門戶略以所有舊事雖未備悉粗見首尾積累思惟二十餘年不在其位非外史庶人所得擅述天誘其衷得備著作郎建言十志皆當撰錄遂與議郎張華分受之所使元順難者皆以付臣先治律歷以籌筭爲本天文爲驗請太師舊注考按連年往往頗有差舛當須增損乃有施行爲無窮法道至深微不敢獨議郎中劉洪密於用筭故臣表上與洪共參思圖牒尋釋適有頭角會臣被罪遂放邊野臣竊自痛一爲不善使史籍所闕胡廣所按二十年之

思中道廢絕不得究竟悽悽之情猶以結心不能違望臣初欲須刑竟乃因縣道具以狀聞今年七月九日匈奴始攻郡監馳縣其時鮮卑連犯雲中五原一月之中烽火不絕不言四夷相與合謀所圖廣遠恐遂爲變不知所濟郡縣咸懼不守朝旦臣所在孤危懸命鋒鏑湮滅灰燼呼吸無期誠恐所懷隨軀腐朽抱恨黃泉遂下設施謹先斃踏刪科條諸志臣所定者一所當接續者四前志所無臣欲著者三及經典群書所宜摭本奏詔書所當依據分別首自并書章左臣初被考妻子迸竄亡失文書無所按請加惶

怖愁恐思念荒散十分不能識一所識者又恐謬誤
 觸冒死罪披散愚情願下東觀推求諸奏參以璽書
 以補綴遺闕昭國體章聞之後雖肝腦流離白骨剖
 破無所復恨唯陛下省察謹因臨戎長霍園封上臣
 頓首死罪稽首再拜以聞

列傳又載邕撰集漢事未見錄以繼後史適作零紀及十意又補諸列傳四十二篇因李催之亂湮滅多不存十意有律曆意第一禮意第二樂意第三郊祀意第四車服意第五車書意第六六臣欽若曰餘四意史不載名

荀悅為黃門侍郎獻帝好典籍嘗以班固漢書文繁難省乃令悅依左氏傳體以為漢紀三十篇詔尚書給筆札辭約事詳論辨多美

劉艾為侍中撰漢靈獻二帝紀三卷

蔡質為衛尉撰典職式

侯瑾公車徵不至案漢書紀撰中興以後行事為皇

德傳三十篇行於世

劉珍為謁者安帝永平元年詔珍與校書劉駒駱作

建武已來名臣傳遷侍中越騎校尉

李尤為諫議大夫受詔與謁者僕射劉珍等俱撰漢

記

應奉官至司隸校尉著漢書後述多所述載

袁崧書曰事天

趙畢會稽人舉有道不就著吳越春秋十卷

趙岐為太嘗著吳越春秋

郭憲為光祿勳撰漢武洞冥記一卷

楊孚為議郎撰交州異物志一卷

魏張璠撰後漢紀雖似未成辭藻可觀

孫該字公達彊志好學著魏書

王粲為侍中撰漢末英雄記八卷

魚蒙為郎中撰典略十九卷

袁曄撰獻帝春秋一卷

陰澹為左將軍撰魏紀十二卷

毛范撰呂布本事一卷

孫舒元撰漢魏春秋九卷

蜀譙周入魏封陽城亭侯撰三巴記一卷

吳謝承字偉平權謝夫人弟為武陵太守撰後漢書

百餘卷會稽先賢傳伍卷

韋曜為黃門侍郎孫亮即位諸葛恪輔政表曜為太

史令撰吳書華覈薛瑩等皆與同後為侍中領左國

史孫皓忿怒收付獄曜因獄吏上辭曰囚昔見世間

有古歷注其所紀載既多虛無在書籍者亦復錯認

囚尋按傳記考合異同采耳目所及以作洞紀起自

庖犧至于秦漢凡為三卷當起黃武以來別作卷事
 尚未成又見劉熙所作釋名信多佳者然物類衆多
 雖得詳究故特有得失而爵位之事又有非是愚以
 官爵今之急不容乖誤因自志至微又作官職訓又
 辨釋各各一卷欲上之繕寫始畢會以無狀幽囚待
 命泯沒之日恨不上聞謹以先死列狀乞上言秘府
 於外科取呈內以聞追懼淺蔽不合天聽抱怖省息
 乞垂哀省矜冀以此求免而皓更怪其書之紕謬竟
 身死於囹圄

周昭字恭遠與韋曜薛瑩華覈並述吳書

萬震為丹陽太守撰荊州異物志一卷

陸凱為左丞相撰雜傳十九卷

胡冲撰吳朝人士品秩狀八卷吳曆六卷

虞禹撰吳士人行狀名品三卷

吳人撰曹瞞傳一卷

晉華嶠遷尚書以博聞多識屬書典實有良史之志
 轉秘書監加散騎常侍中書寺為內臺中書散
 騎著作及治禮音律天文數術南省文章門下撰集
 皆典統之初嶠以漢紀煩穢慨然有改作之意會為
 臺郎典官制事繇是得徧觀秘籍遂就其緒起于光

武終孝獻一百九十五年為帝紀十二卷皇后紀二卷十典十卷傳七十卷譜及三序傳目錄凡九十七卷嶠以皇后配天作合前史作外戚傳以繼未編非其義也故易為皇后紀以次帝紀又改志為典以有堯典故也而改名後漢書奏之詔朝臣會議時中書監荀勗令和嶠太常張華侍中王濟咸以嶠文質事核有遷固之規實錄之風藏之秘府後太尉汝南王亮司空衛瓘為東宮傳列上通講事獲施行又撰紫陽真人周君傳一卷

張華撰列異傳三卷

東晉為佐著作郎撰晉書帝紀十志并所著二魏人士傳七代通記並行於世

皇甫謐累徵不起撰帝王世紀年曆高士逸士列女

等傳玄晏春秋並重於世

又撰韋氏傳三卷

王接為臨汾公相國撰列女後傳七十二人

周處為御史中丞撰集吳書

袁崧為吳郡太守博學有文章著後漢書百篇

祖台之字元辰為侍中光祿大夫撰志怪書行於世

陳術字申伯著益部耆舊傳及志

楊方為高梁太守撰吳越春秋

司馬彪泰始中爲秘書郎轉丞作九州春秋以爲先
王立史官以書時事載善惡以爲沮勸最教世之要
也是以春秋不修則仲尼理之關雖旣亂則師摯修
之前哲豈好煩哉蓋不得已故也漢氏中興訖于建
安忠臣義士亦以昭著而時無良史記述煩雜譙周
雖已刪除然猶未盡安順以下亡缺者多彪乃討論
衆書綴其所聞起於世祖終於孝獻編年二百錄世
十二通綜上下旁貫庶事爲紀志傳凡八十篇號曰
續漢書

陳壽爲御史治書撰蜀相諸葛亮集奏之除著作郎

撰魏吳蜀三國志凡六十五篇時人稱其善敘事有
良史之才夏侯湛時著魏書見壽所作便壞已書而
罷張華深善之謂壽曰當以晉書相付耳其爲時所
重如此元康七年卒梁州大中正尙書郎范頽等上
表曰昔漢武帝詔曰司馬相如病甚可遣悉取其書
使者得其遺書言封禪事天子異焉臣等按故治書
侍御史陳壽作三國志辭多勸誡明乎得失有益風
化雖文豔不及相如而質直過之願垂採錄於是詔
下河南尹雒陽令就家寫其書壽又撰古國志五十
篇益部耆舊傳十篇又壽國志云從荆楊來者得陸

凱所諫孫皓二十事博問吳人多云不聞凱有此表
又按其文殊甚切直恐非皓之所能容忍也或以爲
凱藏之篋笥未敢宣行病困皓遣重朝省問欲言因
以付之虛實難明故不著于篇然愛其指擿皓事足
爲後戒故鈔列于凱傳左云

虞溥爲鄱陽內史撰江表傳卒于洛子渤過江上江
表傳於元帝詔藏于秘書

虞預爲散騎嘗侍領著作著晉書七十餘卷會稽日
錄二十篇諸虞傳十二篇皆行於世

王隱字處叔世寒素父銍歷陽令少好學有著述之

志每私錄晉事及功臣行狀未就而卒隱以儒素自
守不交勢援博學多聞受父遺業西都舊事多所譜
究建興中過江丞相軍諮祭酒丞郡祖納雅相知重
納好博奕每諫止之納曰聊用忘憂耳隱曰蓋古人
遭時則以功達其道不遇則以言達其才故否泰不
窮也當今晉未有書天下大亂舊事蕩滅非凡才所
能立君少長王都游宦四方華夷成敗皆在耳目何
不述而裁之應仲遠作風俗通崔子真作政論蔡伯
喈作勸學篇史游作急就章猶行於世便爲沒而不
朽當其同時人豈少哉而了無聞皆繇無所述作也

故君子疾沒世而無聞易稱自強不息况國史明乎得失之跡何必博奕而後忘憂哉納喟然歎曰非不悅子之道力不足也乃上疏薦隱元帝以草創務殷未遑史官遂寢不報大興初典章稍備乃召隱及郭璞俱爲著作郎令撰晉史著作郎虞預私撰晉書而生長東南不知中朝事數訪於隱并所著書竊寫之所聞漸廣是後更疾隱形於言色預旣豪族交結權貴共爲朋黨以斥隱竟以謗免黜于家貧無資用書不成乃依征西將軍庾亮於武昌亮供其紙筆書乃得成詣闕上之隱雖好著述而文辭鄙拙蕪舛不倫

其書次第可觀者皆人所撰文體混漫義不可解者隱之作也

孫盛爲秘書監給事中著魏氏春秋晉陽秋詞直而理正咸稱良史焉旣而桓溫見之怒謂盛子曰枋頭誠爲失利何至乃如尊君所說若此史遂行自是關君門戶事其子遠拜謝因請刪改之時盛年老還家性方嚴有軌憲雖子孫斑白而庭訓愈峻至此諸子乃共號泣稽顙請爲百口切計盛大怒諸子遂爾改之盛寫兩定本寄於慕容雋太元中孝武帝博求異聞始於遼東得之以相考校多有不同書遂兩存焉

于寶爲著作郎始領國史累遷散騎常侍著晉紀自
宣帝起至愍帝五十三年凡二十卷奏之其書簡畧
直而能婉咸稱良史性好陰陽術數留思京房夏侯
勝等寶父先有所寵侍婢母甚妬忌及父亡母乃生
推婢於墓中寶兄弟年小不之審也後十餘年母喪
開墓而婢伏棺如生載還經日乃蘇言其父常取飲
食與之恩情如生在家中吉凶輒語之考按悉驗地
中亦不覺爲惡旣而嫁之生子又寶兄嘗病氣絕積
日不冷後遂寤云見天地間鬼神事如夢覺不自知
死寶以此遂撰集古今神祇靈異人物變化名爲搜

神記凡三十卷以示劉惔惔曰卿可謂鬼之董狐寶
旣博採異同遂混虛實因作序以陳其志曰雖考先
志於載籍收遺逸於當時蓋非一耳一目之所親聞
覩也亦安敢謂無失實者哉衛朔失國二傳互其所
聞呂望事周子長存其兩說若此類往往有焉從此
觀之聞見之難一繇來尙矣夫書赴告之定辭據國
史之方策猶尙若茲况仰述千載之前記殊俗之表
綴片言於殘缺訪行事於故老將使事不二迹言無
異塗然後爲信者固亦前史之所病然而國家不廢
注記之官學士不絕誦覽之業豈不以其所失者小

所存者大乎今之所集設有承於前載者則非余之
罪也若使采訪近世之事苟有虛錯願與先賢前儒
分其譏謗及其著述亦足以明神道之不誣也群言
百家不可勝覽耳目所受不可勝載今粗取足以演
八畧之旨成其微說而已幸將來好事之士錄其根
體有以游心寓目而無尤焉

謝沉除尚書度支郎何充庾冰竝稱沉有史才選爲
著作郎撰晉書三十餘卷後漢書百卷及漢書外傳
習鑿齒爲桓溫荊州別駕出爲滎陽太守是時溫覬
覦非望鑿齒在郡著漢晉春秋以裁正之始起漢光

武終晉愍帝於三國之時蜀以宗室爲正魏武雖受

漢禪晉尚爲篡逆至文帝平蜀乃爲漢亡而晉始興

焉引世祖諱炎興而爲禪授明天心不可以勢力彊

也凡五十四卷

又撰襄陽耆舊傳五卷

韋謏集爲石季龍太子太傅記世事數十萬言

袁宏爲吏部郎遷東陽太守撰後漢紀三十卷及竹

林名士傳三卷

薛榮爲散騎常侍撰漢記六十五卷

張瑩爲江州從事撰後漢南紀四十五卷

王沈爲司空撰魏書四十八卷

環濟為太學博士撰吳紀九卷

張勃撰吳錄三卷

朱鳳為中書郎撰晉書十卷已元帝

庾銑撰東晉書七卷

嵇康為中散大夫撰高士傳三卷

陸機為平原內史撰晉紀四卷晉惠帝百官名三卷

樂資為著作郎撰春秋後傳三十卷山陽公載言十

卷

荀綽為下邳太守撰晉後略記五卷

王羲之為右將軍會稽內史撰許先生傳一卷

王慶為北中郎將撰二石傳二卷二石偽治時事二

卷

杜預為鎮南大將軍撰女記十卷

喻歸為侍御史撰西河記

記張軌事

孔預為會稽內史撰晉咸和咸康故事四卷

一云各喻

盧緝為廷尉撰晉四王起事四卷八王故事十二卷

范瑗撰交州先賢傳三卷

潘岳為給事黃門郎撰關中記一卷

葛洪選為散騎嘗侍領大著作固辭不就撰神仙傳

十卷西京雜記一卷

蕭廣濟為輔國將軍撰孝子傳五卷

戴祚為西戎太守撰甄異傳三卷西征記一卷

王愆期為散騎嘗侍撰救襄陽上都督府事一卷

孔衍為廣陵太守撰魏尚書八卷春秋時國語十卷

春秋後國語十卷漢尚書十卷漢春秋十卷後漢尚

書二卷後漢春秋九卷後魏尚書十四卷後魏春秋

九卷國志曆五卷

賀循為太嘗撰會稽記一卷

鄧粲為荊州別駕以父騫有忠信言而世無知者乃

著晉元明紀十篇

顧夷撰吳郡記五卷

張氏撰晉書鴻烈六卷

左明楷為石勒記室與程機撰上黨國記

石泰為石勒參軍與石同石謙孔隆撰大單于志

和苞撰漢趙記十卷

田融撰趙石記二十卷

周融撰趙義一卷 一曰石集記云石勒事

范亨撰燕書二十卷

張詮撰南燕錄五卷 記慕容德事

游覽先生撰南燕書七卷

冊府元龜 採撰 卷之五百五十五

張諮撰涼記八卷 記張執事

王景暉撰南燕錄六卷

蓋泓撰珠崖傳一卷

王子年撰拾遺錄二卷 隱十無官

何伸燕撰秦書八卷 記符健等事

劉景撰燉煌實錄十卷涼書十卷 記張軌事

段龜龍為著作郎撰西河記二卷涼記十卷 記名光事

宋徐廣為員外散騎常侍領著作尚書奏左史述言

右官書事乘志顯於晉鄭春秋著乎魯史自聖代有

造中典記者道風帝典煥乎史策而太和以降世歷

三朝玄風聖迹條為疇古臣等參詳宏勅著作郎徐

廣撰成國史於是勅廣撰集焉累遷正員嘗侍大司

農仍領著作如故十二年勅成晉紀凡四十六卷表

上之因乞解史任不許 又撰孝子傳二卷

荀伯子少好學博覽經傳為員外散騎侍郎著作郎

徐廣重其才學舉伯子及王韶之並為佐郎助撰晉

史乃著桓玄等傳又撰薛嘗侍傳二卷

王儉為秘書丞元徽初儉表上所撰七志三十卷

王韶之好史籍博涉多聞父偉之少有志秦元隆安

時事小大悉撰錄之韶之因此私撰晉安帝陽秋既

冊府元龜 國史部 卷之五百五十五

十九

成時人謂宐居史職卽除著作佐郎使續後事記義
熙九年善敘事辭論可觀爲後代佳史又撰孝子傳
十卷

續咸著遠遊志異物志皆十卷行於世

范曄左遷宣城太守不得志乃刪衆家後漢書爲一
家之作曄所撰十志一皆託謝儼搜撰垂畢遇曄敗
悉蠟以覆車宋文帝令丹陽尹徐湛之就儼尋求已
不復得一代以爲恨其志今闕

謝靈運爲秘書監太祖以晉氏一代自始至終竟無
一家之史令靈運撰晉書粗立條流書竟不就

裴景仁爲殿中員外將軍時沈曇慶爲徐州刺史景
仁助戍彭城本僖人多悉戎荒事曇慶使撰秦記十
卷敘符氏僭僞本末其書傳於世

劉謙之好學撰晉紀二十卷

袁炳字叔明有文學爲袁粲所知著晉書未成卒
何法盛爲湘東太守初鄒紹作晉中興書數以示法
盛法盛有意圖之謂紹口卿名位貴達不復俟此延
譽我寒士無聞於時如袁宏于寶之徒賴有著述流
聲於後宐以爲惠紹不與至書成在齋內厨子法盛
詣紹紹不在直入竊書紹還失之無復兼本於是遂

行何書

徐爰為中散大夫撰宋書六十五卷

臨川王義慶撰續漢書五十八卷宣驗記十三卷幽

明錄二十卷江右名士傳一卷

檀道鸞為永嘉太守撰續晉陽秋二十卷

郭季彥為新興太守撰續晉紀五卷

何承天為廷尉撰春秋前傳十卷春秋前雜傳九卷

段國為新亭侯撰吐谷渾記二卷

劉通會為北徐州主簿撰先朝故事二十卷

郭緣生為天門太守撰武昌先賢志二卷述征記二

卷

鄭緝之為員外郎撰孝子傳五卷東陽記一卷

范晏撰陰德傳二卷

袁生壽撰古異傳三卷

劉敬叔為給事撰異苑十卷

陶潛為彭澤令撰搜神後記十卷

東陽無疑為散騎堂侍為齊諧記七卷

劉損為太常卿撰京口記二卷

盛弘之為臨川王侍郎撰荊州記三卷

袁淑為太子左率撰真隱二卷

雷次宗以散騎侍郎徵詣宋邑撰豫章記一卷
南齊臧榮緒爲徐州主簿純篤好學括東西晉爲一
書記錄志傳一百一十卷又撰續洞記四卷

陸澄爲光祿大夫給事中撰雜傳

檀超爲司徒右長史建元二年初置史官以超與驃
騎記室江淹掌史職上表立條例開元紀號不取宋
年封爵各詳本傳無假年表立十志律歷禮樂天文
五行郊祀刑法藝文依班固朝會典服依蔡邕馬彪
州郡依徐爰百官依范曄合州郡班固五星載天文
日蝕載五行改日蝕入天文志以建元爲始帝女自

皇宋立傳以備甥舅之重又立處士列女傳詔內外
詳議左僕射王儉議金粟之重八政所先食貨通則
國富民實宐加編錄以崇務本朝會志前史不書蔡
邕稱先師胡廣說漢舊儀此乃伯喈一家之意曲碎
小儀無煩錄宐立食貨省朝會洪範九疇一曰五行
五行之本先乎水水之精是爲日月五行之宗也今
宐憲章前軌無所改革又立帝女傳亦非淺識所安
若有高德異行自當載在列女若止於當美則仍舊
不書詔曰月災隸天文餘如條議超史功未就卒官
江淹撰成之猶不備也時豫章熊襄著齊典上超十

代其序云尚書堯典謂之虞書則附所述故通為齊名為河洛金匱者

王智深遷太學博士豫章王大司馬參軍兼記室世祖勅智深撰宋紀召見芙蓉堂賜衣服給宅智深告貧於豫章王王曰須卿書成當相酬以祿書成三十卷世祖後召見智深於濬明殿令拜表奏上

劉涉撰齊紀十卷

孔稚珪為散騎嘗侍卒贈金紫光祿大夫撰陸先生傳一卷

祖冲之為長水校尉撰述異記十卷

王巾撰法師傳十卷

梁沈約為尚書令以晉氏一代竟無全書年二十許便有撰述之意太始初征西將軍蔡興宗為啓明帝有勅賜許二十餘年所撰之書凡一百三十卷條流雖舉而採綴未周永明初遇亂失第五卷齊建元四年被勅撰國史永明二年又領著作撰次起居注五年春又被勅撰宋書百卷齊紀高祖記十一卷任昉為新安太守著雜傳二百四十七卷江淹為金紫光祿大夫撰齊史十志行於世李膺為益州從事著益州記三卷行於世

裴子野為鴻臚卿初曾祖松之宋元嘉中受詔續修何承天宋史未及成而卒子野嘗欲繼成先業及齊永明末沈約所撰宋書既行子野更刪撰為宋畧二十卷其敘事評論多善約見而歎曰吾弗逮也蘭陵蕭琛北地傳昭汝南周捨咸稱重之子野又撰衆僧傳二十卷一云撰名僧錄二十卷又欲撰齊梁春秋始草就而卒

顧協為荊州記室撰晉仙傳五篇瑣語十卷

陸昭學涉有思理歷中書侍郎尚書左丞撰晉書未就又著陸史十五卷陸氏驪泉志一卷並行於世

王僧孺為南康王諮議參軍撰東宮新記

蕭子顯為吳興太守好學屬文採衆家後漢考正同吳為一家之書又啓撰齊史書成表奏之詔付秘閣所著後漢書一百卷齊書六十卷普通北伐記五卷貴儉傳三卷

蕭子雲為侍中幼有文彩既長勤學以晉代竟無全書弱冠便留心撰著至年二十六書成表奏之詔付秘閣及為太子舍人撰東宮新記奏之勅賜束帛著晉書一百一十卷東宮新記二十卷

吳均為奉朝請著齊春秋三十卷吳郡錢塘先賢傳

五卷續齊諧記一卷

鍾岷字長丘官至建康令著良史傳十卷

劉沓累官至尚書左丞自少至長多所著述撰高士

傳二卷東宮新舊記四十卷竝行於世

庾詵詔徵中書侍郎不起撰帝歷二十卷

丘仲字為左丞撰皇典二十卷南宮故事百卷

江奮為光祿大夫好學尤悉朝儀故事撰江左遺典

三十卷未就卒

劉之遴為南郡太守撰神錄五卷

劉昭為中軍臨川王記室撰幼童傳十卷

臧儼為鎮南諮議撰棲鳳春秋五卷

陶弘景為諸王侍讀後辭祿自號華陽隱居撰帝代

年曆五卷周氏冥通記一卷草法師傳一卷

梁暠撰梁武帝大捨三卷

鄭忠撰晉書七卷

謝吳為中書郎撰梁書四十九卷梁皇帝錄五卷

王琰為吳令撰春秋二十卷冥祥記十卷

蕭韶為長沙王撰梁太清紀十卷

蕭世怡一云大園封樂浪王仕隋位內史侍郎撰淮

海亂離志四卷

敘梁末侯景之亂

謝綽為少府卿撰宋拾遺十卷

王逸撰齊典五卷

周興嗣為散騎員外侍郎給事中撰梁皇帝實錄三

卷并皇德紀

記武帝故事又云謝旻撰五卷

劉仲撰梁帝聖中興畧十卷

後梁安成王欣博學善屬文著梁史百卷遭亂失其

本

陸雲公為黃門郎兼掌著作奏武帝勅撰嘉瑞記環

述其旨而續焉自永定訖于至德勒成一家之言

陳顛野王為光祿卿撰續洞冥記一卷國史傳三百

卷

何之元為始興王叔陵諮議參軍及叔陵之誅元乃

屏絕人事銳精著述以為梁氏肇自武皇終于敬帝

其興亡之運盛衰之跡足以垂鑒戒定褒貶究其始

終起齊永元元年逮于王琳遇獲七十五年行事草

創為三十卷號曰梁典其序日記之與史其流不一

編年之作無若春秋則魯史之書非帝皇之籍也三

皇之簡為三墳五帝之策為五典此典義所繇生也

至乃尚書述唐帝為堯典虞帝為舜典斯又經文明

據是以典之為義久矣哉若夫馬史班漢述帝稱紀

自茲厥後因相祖習及陳壽所撰名之曰志總其三國分路揚鑣唯何法盛晉書變帝紀爲帝典旣云師古在理爲優故今之所作稱爲梁典梁有天下自古同以前區寓寧晏太清已後寇盜交侵首尾而言未爲盡美故開此一書分爲六意以高祖創基因乎齊末尋宗討本起自永元今以前若干卷爲追述高祖生自布衣長於弊俗知風教之臧否識民黎之情僞爰逮君臨弘斯政術四絕之內寔云殷阜今以若干卷爲太平世不嘗夷時無常治非自我後仍屬橫流今以若干卷爲敘亂泊高祖晏駕之年太宗幽辱之

歲謳歌獄訟唯向西陝而不向東都不庭之民流逸之士征伐禮樂歸世祖而不歸太宗撥亂反正厥庸斯在治定功成其勳有屬今以若干卷爲世祖至於四海困窮五德舛替則敬皇紹立仍以禪陳今以若干卷爲敬帝驃騎王琳崇立後嗣雖不達天命是其忠節今以若干卷爲後嗣主至在太宗雖加美謚而大寶之號世所不遵蓋以扼於賊景故也承聖紀歷自接太清神筆詔書非宐輒改詳之後論茲有理焉夫事有始終人有業行本末之間願宐敘述案臧榮緒稱史無裁斷猶起居注繇此而言實資詳悉又編

年而舉其歲次者蓋取分明而易尋也若夫獫狁孔
熾鯁我中原始自一君終爲二主事有相涉言成混
漫今以未分之前爲北魏既分之後高氏所輔爲東
魏宇文所挾爲西魏所以相分別也重以蓋彰殊體
繁省異文其關損益頗有凡例亦太宗朝賦美而
許亨爲衛尉卿撰齊書并志五十卷遇亂之後撰梁
史成者五十八卷齊書是後立以
陸從典入隋爲給事郎兼東宮學士又除著作佐郎
右僕射楊素奏從典續司馬遷史記迄于隋其書未
成值隋末喪亂

姚察入隋授秘書丞別勅成陳梁二代史所撰雖未
畢功文帝開皇之時遣中書舍人虞世基索本具進
今在內殿梁陳二史多是察之所撰其中序論及紀
傳有所闕者臨亡之時仍以體例誠幼子思廉博訪
撰續思廉流涕奏行思廉初補漢王府行參軍掌記
室尋除河間郡司法大業初中書侍郎虞世基奏思
廉踵梁陳二代史自是以來稍就補續又撰傳國
志十卷
許懋爲著作郎著述行記四卷撰齊記二十卷
趙齊旦爲中郎將撰陳王業曆一卷

